



OCTOBER 2024

VOLUME 64 | NO. 10

# Khristian Thukizakna



● ● ● **Saptuam Kemtute Kipumkhatna** ● ● ●

02 GANDHI JAYANTI

20 TUAILAITE' NIPINI

**EDITORIAL BOARD**

**Editor**

Rev. Dr. S. Vung Minthang

**Managing Editor**

Rev. Thawndouliau

**Contributing Editors**

Rev. K. Kamchinkhup

Rev. Nenglian Vualnam

**Production Managers**

Rev. V. Thangkhanmuan

Upa T. Paukhansiam

Mr. Mangthianlal Samte

**Circulation Manager**

Upa K. Jamchinthang

**Design & Setting**

Upa Khuplaljem Guite

**LAKMAN:**

Kum khat ₹ 150.00

Dak ah ₹ 200.00

Bu khat ₹ 15.00

**CONTENTS**

1. EDITORIAL	: 01
2. TUAILAINA LEH KHANLUTLAI LAH BANGMAHLOU AHI	: 03
3. NA TUAILAINA KUAMAH MUSIT SAK KEN	: 07
4. DIWALI LEH EI SINGTANGMITE	: 11
5. BIBLE STUDY	: 18
6. GAMMIAL AW	: 24
7. DORCAS CORNER	: 29
8. YOUTH CORNER	: 31
9. CHILDREN CORNER	: 33
10. MUSIC CORNER	: 34
11. EBC INNSUNG THU	: 35
12. THU TUAMTUAM	: 37
13. ORDAIN SUNNA	: 38
14. KIPATHU GENNA LEH THUMNA DINGTE	: 39

**Thusuah ding piakna:**

Editor,  
Khristian Thukizakna  
Dorcass Hall, P. O. Box - 6,  
New Lamka,  
Manipur - 795006, India.

*Thusuah sung-a kigente  
Evangelical Baptist Convention  
Saptuam ngaihdan a hikim kholkei.  
Thusuahte'n amau thusuah ah moh a  
pawtek ding uh.*

## SAPTUAM KEMTUTE KIPUMKHATNA

*Huchimahbang in, eite tampi himah lehang Khrist ah pumpi khat ihi ua; atuamtuam in i kihiangtuah chiat uhi (Rom. 12:5).*

September kha tan chidama hon pitung i Toupa tung ah kipahtu i gen ahi. Saptuam kemtute kipumkhatna chih tukha in i kikum ding hi. A theite gendan in Tata Consultancy Services (TCS) kichi company in leitung gam 54 ah nna sem uh a nasemtu 6,01,000 anei uh akichi hi. Semtu huai zahzah pawlpi khat in bangchi sai a bangchi etkol ahi mahmah di ua aw chih ngaihtuah tham a ching hi. Semtute a pankhawm dan uh, akisupport tuah dan uh, aki control dan uh thuguk hoihtak om ding ahi chih theihsa ahi. Eite khua khat hiam school khat hiam a semtu tawmchik omte nasan sikhop simsimte toh kikhiak in a om hi.

Ngaihdan khat ah, pawlpi khat mam taka a pai theihna ding in sum-le-pai kiningching neih a poimoh masa ahi chileng tampiten “Amen” i chithei ding un a gintakhuai hi. Ngaihdan dang khat ah sum kia hilou makaih siamna leh paidan kichiantak neih ding alou theilou ahi chileng le thudik mah ahi zel hi. Huaiziakin, misiamte’n company i chi hiam pawlpi khat peuh in kum 10 hiam kum 15 hiam achin teng in chouna thak (new challenges) phukha teitei sek uh chi uhi. Hiai chouna thak hong omte phupaisuak ding a kikhek (or system update) theiloute a mangthang toutou uhi. Nidanga HMT watch kichite, Nokia phone kichite hun kikhek delhphaloute ahi ua, khovel in taisanta hi.

Saptuam leng khalam a Jesu Khrist pumpi ahih lailai in, salam ah leng mihing kipawlkhawmna pawlpite’ laka khat hi ahi. Huaiziakin saptuam kepna ah pilvan mahmah a kism hi. Pilvanhuai khenkhat saulou in en zual leng: *khatna ah*; Tualsung saptuam ah Pastor khut ah thuneihna om leh hoih pen ding ahi chih ahi. Hiai ngaihdan a zui leng khovel ah a

om tham uhi. Ahihhang in saptuam hatpen ahi tuan khol kei zel uhi. *Nihna ah*; Semtu kidaih neileng saptuam hat ding ahi chih ngaihndan hoihtak omnawn hi. Etsakna dingin - Pastor akisam zahzah, Evangelist a poimoh zah lazou leng saptuam hatmai ding a gintakna. Ahia apoimoh zah ichih bangzah ahia chih lel leng theih haksa a suak hi. Saptuam ah nasempawl om ding, na sepsak a om pawl om dingin Bible in hon sinsak kei hi. Jesu'n "Mihing Tapa nasepsak a om ding in a hong paikei a, nasem ding leh mi tampi tatna dia a hinna pe ding a hongpai ahizaw hi" a chi hi (Mat 20:28). *Thumna ah*; Kha Siangthou kia a poimoh ahi, doctrine gengen kullou, bye law poimohlou, Kha a halhthakna kia ahi chih ngaihndan om hi. Ahi a, thugin tellou, kivaipuakdan kichian omlou a pawlpi pai theilou zel ding hi.

Saptuam pianzia hoihtaka i sui leh michihte'n Kha thilpiak thopna a neihte uh zang a kikepna ana hi ahi. Saptuam ichih a building hilou gingu mimalte hizaw uhi. Gingu mimal Kha thilpiak tangte midangte Jesu' nungzui dinga makaihtute ahipah uhi. Tua saptuam memberte a khen lounasem pawl, Bazar kai pawl, dawr bawl, office kai, school kai, sinsaktu, galdou pawl, tate kem pawl, in ngak pawl chiin atuamtuum ah khosa uhi. Hiai saptuam memberte enkaitute saptuam kemtute akichi hi.

Tata Consultancy Serviceste'n nasemtu nuai 6 val a neihte un kithutuak leh kipumkhat taka nna asepe theihna ding un, hihndan kizen tak anei ding uh chih pen a thuguk uh ahi. Pathian saptuam ah leng a sem pawl om, a semlou pawl om ding chih thu a om kha kei a gingu mialmal chiat Amah theihpihtu ding a hotdam ihi uhi. Huaiziakin sep ding neilou mival kuamah omlou, Jesu'n amah nna sem ding a hon leisa (employed) ngen ihi uhi. Huai nasep ding ichih tuh Jesu' nagot thupi nungzuite bawl ding ahi. Paul in gingu mimalte pumpi kahiang toh teh in hichiin agen hi "kahiang tengteng in amah sep ding chiat a hon sep chiangin, huaiin pumpi a khangsak a, itna ah amah leh amah a kilamtou hi" chi hi (Eph 4:16 parallel Bible). Khrist tuh kipumkhatna suangphum ahi, Jesu itna a kikhilkhawm, Kha Siangthou thatna a nasem makaite'n Pathian saptuam lamtou in khangsak uhi. ■

## Tuailaite' Nipini Message

# “TUAILAINA LEH KHANLUTLAI LAH BANGMAHLOU AHI”

EKLIJIASTI 11:9-10

- Rev V Thangkhanmuan, Youth Co-ordinator EBC

*“Aw tangval, na tuailai in kipak in: na tuailai nite ah na lungtang in hon kipaksak hen, na lungtang lampite ah leh, na mitte muh in om in: himahleh, hiai thilte tengteng ziak in Pathian in nang vaihawmna a honpi ding ahi chih thei in. <sup>10</sup>Huaiziak in, na lungtang a kipan lungkhamna suankhia inla, na sa a kipan gilou koihmang in: tuailaina leh khanlutlai lah bangmahlou ahi ngal a.”*

**M**unchih mualchih a om ka tuailaipih tengteng i Hondampa leh Toupa Jesu Khrist itna toh chibai ka hon buk masa hi. October kha eite a ding in kha poimoh mahmah leh kumbul apan i ngaklah mahmah hun khat ahi. Tukha in ni poimoh mahmah TUAILAITE NIPINI koimun peuh a kizang chiat ding ahiman in manpha leh gahsua tak a i zat chiat leng deihsak thu ka hon khak hi.

Tuailai i hihlai in ei mahni nopsakna ding kia zong in, a nuam ding lampi kia i zong uhi. Thakhat a thil hong kikheng zelzelte'n tuailaite naktak in hon subuai zou hi. Tuailai i hihmah ziak in thil tampi i dotnop i theihnop, i chepnop, i muhnop leh i khoihnop a om lai in khenkhat kalsuan khat didan le theizou nawnlou, panpihtu di kism sa lua, innkuante hi in khotang sung a tazou kisa nawnlou tuailai tampitak om uhi. Tuailai hun tuh taksa hi in lungsim hitaleh naktak a akikheng ut ban ah

piching hinkhua manoh a ki hi hi. Hiai stage ahiehleh naupangte dan a thumang dia kithuhilh leh pichingte omdan a om dia kihilhna hun ahi. Himahleh, hiai hun ah tuailai i hihlam bang le min hon pomthei leh kichi tangpi hi. Tuailaite ahiehleh atangpi a min ei hon bang chi muh ua, ka kichei dan bang achi a, kipilsak hun leh lawm i ngaih mahmah hun ahi.

Tuhun a tuailai tamtakte a hinkhua ua a poimoh pen dia a koihte uh ahiehleh khovel a hauhsak di, huai zoh kiningching

leh nuamtak a om di chihte ahi. Banah a hinkhua ua tup leh ngim tuamtuam nei uhi. Khenkhat ahihleh nopsakna kia zong in, zu khawng hon dawn uh, nungak leh tangval kingaihna thaanghuai tak a hong om uh, branded van chauh deih in anu le pate uh genthei mahmah, sum zatna sang mahmah leh lawm bang le a nei zou deuchte chauh ngai, a la ngaihte uh leh a etnopte un Pathian phat kha mahmah lou, himahleh hiai mite'n koimah ah nopsakna muzou tuanlou uhi.

I theihsa mah bang in hiai tuailai hun hi a bangkim ah a rate a san penpen hun ahi. Buai hun lai mahmah ahihziakin niteng phial ah kim le kiang ah buaina di kimu, tup taktak nei theilou, thilhih dia hithei thou hilele piang khe taktaklou, lungkim veve lah bukim hi tuanlou. Huaiziak in akichiang mahmah ahihleh hiai stage a omkhate'n Pathian ka Lal leh Hondampa din ka sang a chih hangun Pathian in bang dia amau a bawl ahia chih thei lou uhi. Hinkhua a tup leh ngim theih na dia tuh khalam theihsiamna i neih masak ngai hi. Tup leh ngim i chih chiangin sepna zonna, siamsinna, sum

muhna, mahni siamnate kia gen hilou ahi. Huaite sang a poimoh penpen tuh Pathian i thei na hiam, i kinaih mahmah na hiam, a ziak ahihleh amah toh kizopna taktakna i neih chiangin i hinkhua a kikhekna hong kilang ding hi. Ei lohchinna Pathian tellou a i na panlaktate'n bangmah tan hon tun kei a, lungkimlouhna leh ningkitelna ngen in ahon pumtuam hi. Ahihhang in Pathian thu ngai a amah toh tonkhawmte bel aman a hinkhua ah a lampi paina ding a musak dia, vualzawlana leh lohchinna in avuk ding hi.

I mobile phone te lah pan deuhdeuh, i khuakte uh lah sah deuhdeuh, i theihtheihna in eite hon bawlzoulou ding hi chih kichian mahmah. I kihou theihna dia lah vanzat tampi omta huihkhoa hi in, tuipi leh lei nuai sung a hitaleh, ahi a lah i lungtante uh khauh deuhdeuh in thil houhcik kihou nadi bang le kihou taak sa nawnlou. Asiam ahih nakleh hoihsa pah. Akin ahih nakleh kipahpih. Tu hun ahihleh mipha zouzou hampaha, atou nadiam sawt akisen thei diam chihte ki-en nawnlou hi. I lungsim uh lah tom deuhdeuh in mi ngak zohnate lah bei, tomcik mi i ngak khak leh bang kiningtel

hipah. Huai Chiang achu phone khawng a om leh adan om, i kim kiang a omte lah kihou sawm mahmah lou, huai hun a lawm poimoh i hihlam min ahon theih khak di bang kilau daih in, huai sanga a whatsapp/facebook/instagramte a thu omte khawng awlmoh zaw dan a om. Hiai tuh i khankhiatna dan ahihziak ahi. Abik tak in lauthawanna leh muanmoh hatna i nei lian mahmah hi.

**HINKHUA A TUP KICHIAN TAK NEIHNA DINGA DEIHTELNA:** I hinkhua ah tup leh ngim taktak ineih louh chiangin ei leh ei nangawn le kitheih siam haksa ahi. Huai kia lou a Pathian i biak utna, mi i panpih utna khawngte bang le beithe. Kipiakna taktak neilou a bel kimangthang ding banah aloh didan theilou in kivakvai ding hi. Pathian in eite zalen tak a deihtelna thak neithe ding leh kipiakna thak neithe ding in hamphatna hon pia hi. Laisiangthou a kigen mah bangin eite belum za lak a khat banga Pathian in eite hinna thak nei thei ding leh deihtelna thak nei ding in hon sam gige hi, ahihziakin i lungtang i khauh sak le bel ki mutuan lou ding hi. Huaiziak a i hinkhua ah Pathian khatna a ikoih gige masak

ding, hileh en Pathian itna kimu deuhdeuh ding, ei le ki it didan khawng leh i innkiangte it didante kitheichian ding hi. I laisiangthou a kigen tuh “Hinna tel un” kichi hi. Pathian in deihtelna ding lampi nih hon pia a, lampi ahoih leh hoihlou, hinna leh sihna hiai tuh zalen tak ah deihtel thei hi. Deuteronomy 30:15,19b-20a “Tuni in ahoih leh hoihlou, hinna leh sihna na teel ding un, ka hon pia ahi. Hinna pen tel unla, Toupa na Pathian uh it unla, a thu mang un; amah a dingin ginom un, huchi in nou leh na suante damsawt ding...” Toupa’n thupiak zuih dia hon piak tuh hinna tel ding chih ahi, hiai in tu leh tangtawn gam hon tun hi.

**HINNA I CHIH BANG AHIA?** Tu hun a tuailai tamtak koi a kipan ka hia chih theilou, kua hon bawl ka hia? chih leh a hinkhua ua tupna neilou tampi om hi. Laisiangthou in agen bangin, “Toupa aw, ka hinna uh thununna leh, ka tunung ding ua thuneihna nei; kuamah ka om kei uh chih ka thei hi” (Jer.10:23). I theihsa mah bangin i hinna ei a ahikey a, i nu le pa hiam, mi tuam a ahi tuan sam kei hi. Hinna tuh thupitak a Pathian in abawl, lei leh van banah nang



hon siampa mah ahi, huaiziakin amah chauh ahi na hinna neitu. Hiai thudik na gintak a ahihleh na hinna pen nang ut dandan a paipih theilou ding, na hih khempeuh Toupa deihdan a om ngai ahi chih mangngilh ken.

**TUP NEI A HINKHUA ZAT DING:** Mihing khat in tupna tuamtuam inei thei a, khenkhat tomchik sung daih ding tupna nei in mangthang tamtak ki omta hi. Huaiziakin hinkhua a tup ineih chiangin muan theih ding poimoh mahmah. Saupi daih ding i ngaihtuah chiang in tu hinkhua chauh hilou a tangtawn daih ding tupna i neih ngai hi. A huchih kei leh laisiam hi in, pil kisa mawk le hang le detlou a kichimpah mawk thei ahihman in. Augustine in hichin ana gelh hi “Thou hast made us for thyself, and our hearts are restless until they find their rest in thee.” Hiai in agen tuh nang leh kei tuh Toupa ading a kisiam lel ihi, i lungtang in tawldamna a ngah theihna di mun tuh amah kiang lou ngal a om kei. I hinkhua tuh Pathian a kingak a i lungtang a Pathian koih a, tangtawn lampi zuan le hang i tupte tua hinkhua chauh hilou tangtawn tangtawn daih ding hi.

**MAHNI KITHEIHEL TUPNA:** Jesu Khris khovel ah ahong lenlai in atup athei mahmah a, i laisiangthou ah amah hichin ana gen hi, “ka hong kipatna leh ka zotna ding lam ka thei ngal a....Keimah tuh lampi, thutak leh hinna ka hi; keimah a tawn lou in kuamah Pa kiang atung ngei kei” (Johan 8:14; 14:6). Theihshiam nop leh kigen chiang mahmah a, huai tuh i ginna Jesu Kris ah koih lehang aman i lampi paina di ahon hilh ding a, i hong kipatna leh bangziak a ei hiai khovel a kiom ahia chih thugukte hon hilh ding hi. Hilehleng Jesu Khris in huai kia lou le agen om lai a, huai tuh Jesu ah ginna neite bel Pathian ta ahi ana chi ahi, huaiziakin eite Pathian a ihi ua, amah gou luahtu leh nungzuite ihi uhi (Romte 8:16). Pathian ta na hih taak ziakin unlimited thuneihna nang ah om khin ahi. Eiten itheih di chu bang chi bang in hiai thuneihna izat khiak ding chih ahi a, i laisiangthou ah, “Pathian ei lam a apan leh kua ahia hon dou thei ding?” (Romte 8:31). Gingtu tuailai khat ihihna ah melma tuak tham ding, haksatna, khemna



leh buaina tuamtuamte in hon tuam mahleh hiai hun chiang a i muanpa Jesu thuneihna in ana zouzou zel ding hi.

**PATHIAN TOH I KIKAL MUHSUAH DING:** Ka hinna pen kei a ahi chi in, nang adi chauh ngaihtuah a hing na hiam? Na hinkhua mi a di kia a hing na hiam? Na nungaknu/tangval/innkuante adi kia a? Ahihkeh nang hon siamtu Toupa adia hing na hi hiam? Na hinkhua na ut dandan a zang mai na hiam? Hinna na neih kua ziaik hidin na gingta a? Na hinna Pathian thupina dia zang na hih leh adik mah ahi. Hilehleng hiai bang a na hinkhua zangkhalou na hih leh na hinna zangkhal na hi. Tu

mahmah inle Pathian kiang ah panpihna ngen in hileh aman hon bawldik ding hi. Toupa na Pathian tuh akhatna a na koih gige ding banah amah deihdan a na hinkhua na zat ding ahi, aziak tuh na hinna san ahih ziaikin.

Tu hun khawng a na lungkimlouhnate khawng ziaik a Pathian le phawk khalou a khosak hun hinawn lou ahi, tu hun a tuh Pathian, inkuan toh hun atam thei lam na zat leh thilthupi leh na theihngei louh thukiselte hon theisak semsem ding hi. Huaiziakin eiten i deihtelna i zat dan a kinga mahmah ding ahih manin TOUPA mah bel tinten ni. ■

## NA TUAILAINA KUAMAH MUSIT SAK KEN

- Pastor G Khankham, EBCC Thingkangphai

*Let no one despise your youth, but be an example to the believers in word, in conduct, in love, in spirit, in faith, in purity (1Tim.4:12 NKJV).*

**H**iai thu tuh tuailai Timothy kiang a sawltak Paul hasotna thugen ahi. Paul in Timothy tuh ginna a ka ta chi in a kineisak mahmah hi. Muanhuai sa ahingei ding a, tuailai leh naupang lai mahmah himahleh Ephesa khua a Pathian saptuamte kemtu ding in koih hi(1Tim.1:3). Hiai ah sep ding mohpuakna lian mahmah nih a guan: Sinsakna diklou nial kalh ding leh Ephesa saptuam

khanna enkai a vengbit ding in. Tuailai kum tam nai lou ahihna kuamah kisimmoh sak lou ding leh gingtute a dia etton tham ching a omna ding thil tuamtuam chiguk khawng in hasotna a pia hi. Huaite en leng i zuih ding leh etton ding uh deihna toh sau loulou in enkhawm leng chi in ka hon taklang hi.

**THUGEN AH:** Kemtu leh sinsaktu adia poimoh mahmah tuh thugen ahi. Sinsakna, taihilhna, hasotna leh a hun toh kituak a mite dinmun dung zui a kampau siam zong poimoh lai ding hi. Aw suak bang zong a khauh deuh, a sang deuh, a vin deuh ban ah a nem leh kamdam a poimoh hun zong om ding hi. Thumal zat ah pichin huai, leh zak nuam ngaihkhiaik nuam leh tawldam chih bang om ding hi. Thumal siknei, hiam vilvel, mi at liam gawp chih bang om thei hi. Mihai nangawn a daih dide lai in, a pil a sim ahi; a mukte a chih lai in, pilvang bang a ngaih ahi (Pau.17:26). Kampau a pilvang, gen ding thute a hun leh amun toh kituak a paukhe thei, gen khe theite tuh kampau a piching ahimai uhi. Kigen pawt, kigen lut, kigen ba, kigen siang chih tengteng thugenna tungtawn a hong om ahi vek uhi. I thugen leh kampau apan min hon ngai thei, hon mudah thei, hon zahtak thei, hon

simmoh thei ahihman a pilvan ngai ahi.

**OMDAN GAMTAT AH:** Tuailai hun tuh muh teng ching nuam, mi omdan leh gamtat dan teng bang eng, mi sam style teng bang zuih sawm, tulai pasalte tuh mukmul, khamul hawi kithan laitak ahi. Kilawm bang kisa chiat mah i diam hawi sauhsauh laitak tuh ahi. A kum lam ah a naupang mahmah na a, a thugen dan, a omdan leh a gamtat ah piching mahmah e, i chihtheih bang om hi. Khenkhat leuleu lah nupi, papi nung nangawn a kampau leh omdan, gamtat a piching thei mahmah lou chih bang zong om zel hi. I kampau, omdan leh gamtat a min hon muhsit louhna ding un kiveng siam, kikem siam le chih iki deihsak chiat uhi. Naupang pau, naupang gamtat bang maimai a om nawn lou ding TUAILAI piching hita, i thugente zong naupang thugen hon chi nawn lou ding ua, i omdan gamtatnate zong i khelhna

om leh mat theih gap theih hita i hihman un kilawm takin Khristian gingtute adia etton tham ding in gen in gamta chiat ta ni.

**ITNA AH:** Muhdahna, huatna, hazatna, thikthusiatna, huaihamna, angmasialna, duhamna chihte khawng i neu apan i neih chiat uh ahi. Hiai tengtengtuh i mihinpih u leh nau, sanggam laizom leh midangte toh hon kilemlou saktu, hon kinasaktu, hon kimelmasaktu ahi vek uhi. Ei Khristian gingtu nungak tangvalte itna leh kingaihna toh kisai a Khristian lou leh gingloute a dia etton tham ching a i om ding uh ahi. Toupa Jesu thupiak tuh, “Na melmate uh it unla, a hon sawite thumsak un (Mt.5:44)” Itna leh lainatna lungsim toh ki en leng mi’n hon hehsan lou dia, ei mahmah zong i lungkim ding. Itna leh hehpihna mit toh mi a en theite mi toh kilem leh thusia, thuhaksa leh buaina hau lou, mi’n ngaina, mi’n a kiang ua om nuamsa ahihman un a hampaha uhi. Muhdahna, huatna, hazatna, thikthusiatna, huaihamna, angmasialna leh duhamnate tengteng tung a vualzou leh huaite tengteng kilempih thei pen tuh “ITNA” ahi.

**KHA AH:** Pathian Kha omna mite kiang a om a nuam a, lunggim leh tawlte a ding in tawldamna, lungkhamna puakgik pote a ding in zangkhaina, lungkhamna, mangbatna, taksapna tuamtuamte ziak a lunglel lungkete dawn thei Pathian kha in ompih ahihman in, mi amau poimohna leh taksapna bangbang toh pawl thei uhi. Piangthak, Pathian kha ompih hinapi a salam deihdan teng mah gelgel a khalam vuallel sak nilouh ihih khak ding uh lauhuai lua hi. Evan. Lang Do Khup laphuah “Aw ka laukha zuan lung zuang mah si maw, ka taksat ze-etna douzou lou a; Pasion mai a kilawmna nei lou, Hong ning maw, Toupa hong mai sak aw, chi in Toupa deih leh hoih sak bang in a kiang i zuan ding uh. Piangthak khempuehte Pathian a, a kha a chiamtehte ihihman un taisansan nawn lou in om hithiat zaw ni.

**GINNA AH:** Zeksum ziak leh dan zuihna ziak a siamtang hilou in ginna a, athawn a siamtan sak a om eite ginna ah i omna uh hiam kivel chian zel zel ni. Heb.11:1 Ginna tuh thil lamette om ngei a theihna leh thil muh louhte theihchetna

ahi ana chih dik mahmah hi. Khristian tengteng leitung a i tam sung in thil hong tung ding Laisiangthou in a hon hilhte ginna toh a mu leh a sangte ihi uhi. Huai mah Pathian deihdan ahi. “Mulou a gingtate a hampaha uh” chih bang a na om man in, a hampaha pawl a pangte leng ihi zel lai uhi. Thil lamette om ngei ahi chih theihna, thil muh louhte theihchetna, hiai bang ginna neitute tuh mihai chihna ding bangmah a om thei kei himhim hi. Khristian gingtute “GINNA” a thupi in a lamdang lua hi. Na tuailai hun in na ginna humbit in, thildang, khovel thupinate dep mang sak het ken.

Jingsang teng in Pathian kiang ah phatna, pahtawina leh thumna in amah houpih inla, a thu thuk leh thukiselte thei ding in a hon houpihna Laisiangthou sim gige in.

**SIANGTHOUNA AH:** Khristian gingtute midangte a dia etton a i om theihna ding tuh “SIANTHOUNA” ahi. Mi tengteng toh kituahna leh siangthouna delh un, huai siangthouna lou in kuamah in Toupa a mu kei ding hi(Heb.12:14).Mi tengteng toh

kituahna leh siangthouna, hong pai a, ei kiang hong tung ding hilou in en i delh ding uh ahi. Toupa muh sawm leh a mah toh van khopi a ten sawm gingtu tengteng in siangthouna i delh ekek ding uh ahi, huai lou a Pathian mu lou ding chih a hihman in. Pathian hihna poimoh pen tuh SIANGTHOUNA ahi. Amah a kipulakna mun ah, “Na Pathian uh hi ding a Aigupta gam a kipan a nou hon pikhia Toupa lah ka hi ngal a, Kei ka siangthou ngal a, huaijiakin nou leng na siangthou ding uh ahi(Lev.11:45). Hiai thumah tuh poimoh ahi ngei ding Thukhunthak aleng hong kigelh nawn zel hi. Noute na siangthou ding uh ahi, kei ka siangthou ngal a(1Pet.1:16). Nek leh dawn, tep leh muam, omdan gamtat, nek zonna, sum leh pai zonna, numei pasal kal ah siangthou ding in Toupan hon deihi.

Tuailai Day 2024 ah mite simmoh leh muhsit a i om louna ding ua deihuai Laisiangthou tungtawn a thupiak chigukte ah kibawl thakna, kisiamthakna Pathian in hon pe chiat hen. ■

# DIWALI LEH EI SINGTANGMITE

- Chingngaihlian Tunglut

**P**athian' zahngaihna ziaak in, taksa kum behlapsak in ki-om zel a, huai toh ton in, Khalam ah leng masawn di'n Ama'n hon pii zel hi. A hehpihna leh itna sung ah, Amah lauhdan leng hon sinsak tou zel hi. Khalam a khang dia hon pii ziaak leng hidi'n ka gingta a, kiimkiang phawkna dan leng chituumtak khat hong om hi. Huaichu, Singtangmite Khristian himah le'ng, gingtu hiloute toh khotaang khat ah i khosakhawmna uah, amau sahkhuah toh kisai thilchiinte khawng i va kop gawp sek pen uh, poi sak luat velvulna khat hong om hi. I ngaihtuah sau louh ziaak uh leng ahi dia, khut a bawltawm milim biakna leh Jesu Khrist a kibulphuh hilou sahkhuah dangte thilhihte khawng 'naupangte kipahna' suanlam in, naupangte kihelpih hiam, ahihkeileh kihel dia i phalsak sek pen uh, Pathian leh i kizopna uh dausaktu khat hi'n ka ngaihtuah hi. Tulel a Khotaang leh Saptuam dinmun siatna leng, naupangte a paina di ua i na chiil louh ziaak uh hi di'n gintaak huai hi (Paunaakte 22:6). Huaidan ahihman in, i meltheih mahmah uh khat, huaichu, Diwali omzia suut zek le'ng chi i hi.

**Diwali bang ahia?** Diwali (Deepavali) ahihleh Sanskrit thumal ahi a, "a vual a meidet kide" chihna ahi. Hindu-te kut (festival) poimoh mahmah ahi a, khovel pumpi ah amau omna mun khempeuh ah thupitak leh nuamthei pen in zat in om sek hi.

Hindu Lunar calendar dungzui in Diwali pen October leh November kikaal a kha thak (new Moon) ahong suak hun leh a mialpen hun a tungkha

sek ahihman in, meidet (khuailu meivak leh tungman khawnvak leh kawlphe mei) de vak phingpheng sek ua, 'Hoihna in Gitlounha tung ah vualzou ahi' chih etsakna hi'n pom uhi.

Hiai Meivak Kut ("festival of lights") pen ni 5 sung daih sek hi:

- 1) A ni masa pen ni in, innsung-innpua hahsiang in Rangoli etlawm taktak

- bawl sek uhi. Rangoli ahihleh anntang hekvui rong tuamtuam kihel ahi a, innsung leh innpua tuanglaite (floor) ah paklem khawng leh zeem (design) tuamtuam in bawl sek uhi. Rangoli ahihleh malai pek a Hindu sahkua biaknadan in, phui-sam kawm leh a pathian uh phatna laa sakawm khawng a ana patkhiat uh ahi. Sahkua ni poi hmoh dangte hun in leng, Rangoli bawl sek uhi. Khalam a poi hmoh leh omze neitak hi'n ngaihtuah ua, a zeem leh rong (colour) zat dungzui un, tha (energy) tuamtuam khah khiaktheih hi'n gen uhi.
- 2) A ni 2 ni ahihleh nek-leh-taak tuamtuam bawl na leh leina in zang uhi (adiak in akhumlam - Mithai, hah bawl uhi). Huai kia hilou in, amau suangtu asisate a diing in thumna khawng leng neihsak sek uhi.
- 3) Ni 3 ni ahihleh a Nipi Ni hi a, tanau-laina, lawm-le-vual toh khawnvak tuamtuam a vual a de diudeu in, haalpuak khawng haal in, nuam tak in biakna leh kipo lhimna hun zang sek uhi.
- 4) A Ni 4 ni ahihleh Nupa kikal poi hmoh ngaihna hun zang ua, pasalte'n a zite uh thil thawnpiak (gifts) khawng piakna nei zel uhi.
- 5) A Ni 5 ni ahihleh unau pangkhawm numei leh pasal kizopna pahtawina di'n zang uhi.
- Diwali kut lawmchiat mahle uh, Hindu-te'n India gamsung ah amau omna mun (region) dungzui in a khiakna tuam chiat kineih uhi:
- 1) India Mallam (North) ah, Raavan (lutang 10 nei dawi/demon) tung a Ram (god) vualzou a Ayodhya a tunkik vaidawnnadan in zang uhi.
- 2) India Simlam (South) ah, Krishna (god) in Narakasura (demon) tung a avualzohna lopna in zang uhi.
- 3) India Tumlam (West) ah, Vishnu (god) in dawi kumpi khat Bali, kichi leinuailam-khovel a vaihawm dia khovel a kipat a nohkhiak ni chiamtehna in zang uhi.

4) Huaiban ah, Jain-te'n ahihleh, Mahavira in 'Nirvana' (spiritual awakening/ khalam khanlohna) a tan ni chiamtehna in zang uhi. Sikh-te'n ahihleh, a Guru-te uh lak a poimoh mahmah khat, mat a a omna apat khakhkiak ahih ni chiamtehna in zang uhi. Hun hong pai zel a, Buddhist-te natawm in leng hiai kut loppihtha uhi.

Hiaitan i theihna inleng, Gingtute'n Diwali pahtaakkuatna di om hetlou ahihdan chiangsak mahmah hi (Ephesate 5:8-17)

**Hindu sahkua adia hunbi siangthou:** Diwali hun sungteng hunbi siangthou in pom ua, Lakshmi (hauhsakna leh mavanna' pathiannu) in 'Hauhsakna leh Lohchinna' innsung a hong pawlut diing hi'n pom uhi. Lakshmi zolna leh vaidawanna di'n khawnvak chi tuamtuam a vual a de in, kongkhak leh tawlette bang honsa in nuse sek uhi. Hiai hunbi in amah biakna bang leng piibawl diak uhi.

Inn chih ah, innsung, kongkhak bul leh inn kiim-kiang,

biakna munte, diil (lakes) leh luitate (rivers) natawm tung ah tungman khawnvak (clay lamps) leh khawnvaak tuamtuam de sek uhi. Mial himhim omsak louh diing atup uh ahi. Himahleh, i theih di ua poimoh chu, vaak tengteng le Pathian' vaak hisese lou hi, kha tengteng le Khasiangthou ahihlough bang in (2 Korinthte 11:14; 1 John 4:3).

Ataangpi in nitaak a hong kipat toh kiton in haalpuak chi tuamtuamte (firecrackers) haal sek uhi. Hiai haalpuak pen, khenkhatte'n kha-niin (evil spirits) hawlnadan in pom uhi. Ahialah, Setan amah leh amah kidou lou hial ahi chih i thei uhi (Matthai 12:26). Hiai Kut sung in nek diing a-khum leh a-al chi tuamtuam, hiai hun a bawl dia a bikhiahse sekte uh bawl in, innkuan, lawm-le-vual, tanau-laina toh thilthawnpiakte (gifts) khawng kipetuah in kivehtuah zel uhi. Puja (a pathiante uh biakna hun) khawng zang khawm sek ua, nek zonna leh sum dawanna tuamtuamte leng khawlsak sek uhi.

Gingtute'n hunbi Siangthou biik i nei kei ua, i hunteng uh,



Pathian adia siangthou a i zat diing uh hizaw hi. (1 Peter 1:15; 1 Thessalonikate 4:7)

### **Prasad nek di hia nek louh di?**

Biakna hun a zat khith Chiang un, innvenge, innkuante leh lawm-le-vualte kiang ah Prasad (a pathiante uh mai a latkhiaksa), hawm sek uhi. ‘Prasad’ i chih Chiang in, nektheih Sa (meat) pang hetlou (vegetarian) Hindu sahkua toh kisai a omze neitak a bawl leh nek ahi. A pathian kiang ua alat ‘siangthou’ uh, huai pen mah pathian in hon piakkik chi in pom uhi. Biakna abei Chiang in zahtat tak in ‘prasad’ ne sek uhi. ‘Mahaprasad’ a chih uh leng om a, huai ahiehle Hindu leh Sikh-te’n a temple ua nek-le-tak mipi nek diing a, manbei a, ahawm sek pen uh ahi. Hiai leng a pathiante uh kiang a alat masak uh ahi.

Sawltak Paul in, Korinth mite ana taihilhna, “Ahihhang in, kua hiam in, Hiai zaw kithoihna ahi, chi a, a hon hilh leh, sia-le-pha theihna zia in ne kei un amah nou a hon hilhpa zia in” (1 Korinthte 10:28), a thuzuih bikhiah (principle) ei adiing inleng zatkhiak theih hi. ‘Prasad’ i chih, milim pathian

mai a kithoihna ahi chih i theihsa ahiehziak in, ei Pathian hing bia Singtangmite a diing in nek siang lou chihna suak hi.

“Amau pathian biakna dan a Prasad ne lah hilou a” chi i hihleh, Paunaakte 14:12 ah, “Mihing a dia lampi dik a kilawm a om a, himahleh huai tawpna sihna lampite ahi” chih om zel hi.

Gensau deuh le’ng, 1 Korinthte 8:4-8 sungmah a thuzuih bikhiah i zatkhiak theih di un om nawn hi. A tomlam in gen leng, thil tengteng siamtu Pathian khat kia om chih pomte i hih uleh chu, pathian lemte mai a latsa nek leh dawnte, ei Pathian khat neite leh Toupa Jesu tungtawn a ‘Hinna’ ngahte a diing in, a poina om lou kichi hi. Hiai suanlam a ‘Prasad’ nete a diing in 1 Korinthte 8:9-13 sung ah Chiang huntawk in muhtheih hi. A zatkhiak theih geih di’n gen nawn le’ng; i ‘Prasad’ nek pen ei sang a khalam a hatlou zawte kupalpuukna a suah leh poi mahmah diing chih i mu hi. Bangziak i chih leh, Amau Khrist a i sanggamte ahi ua, amau tung a hichibang a khial

i hihleh, Khrist tung a khial kisuak hi.

Gensau sawnsawn lai le'ng, 1 Korinthte 10:31 ah Sawltak Paul in hiandan in ana gen hi: "Huchi'n, na nek uh hiam na dawn uh hiam, na hihpeuhmah uah leng, Pathian thupina diing ngen in hih un." Pathian lem kiang a kithoihna nektheih – 'Prasad' nek chih khawng chu, Pathian' Min thupina dia nek hi mahmah lou aka maw! 'Prasad' hihna theita i hihman in, i nek leh neklouh di zaw, i sung a Khasiangthou in Pathianthu pansan a, i sia-le-pha theihna akam leh kamlouh ah kinga tave maw!

"Khristian ka hi" kichi a khovel tawndante kopsuk mai zel di maw? Ei singtangmite leng India gam mi i hihman un, phualpi sorkar nuai ah sepna leh sepna chi tuamtuamte ziak khawng in, khopi tuamtuamte ah, khosakna hoihzaw delh in, pemkhia kitamta hi. India gammi atamzaw Hindu-te ahi ua, i tenna mun peuh ah amau toh sepnalam leh khotaang ah, khosakhawm i hihman un i pilvanna diing uh leng omzek hi. Diwali toh Khriatiante i kisaikhakna uh omkei mahleh,

lawm-le-khanvual hi'n, sepnalam ah heutu leh seppih Hindu-te lak ah va tuitum luatkhak theih a, Diwali lopna khawng ah va kihel ek khak theih hi.

"Khristian ka hi", "Mi piangthak" ka hi kichi kawmkawm a, Diwali lopna khawng a kithalawpna nei i hihleh, ei leh ei kia hilou in, i Khristianpihte kia leng hilou, Jesu Khrist tanpha zahlaaksak kihi maimah ahi. Kingaihtuah thuuk zek le'ng zaw, Diwali lopna a va kithalawp luatna khawng, lungsimtak ah zaw kisiamtan luatna di om hetlou hi.

Huaibang a gingloute sahkhaw vai khawng a, piichingte kithalawpna ana mu sek a, enton a, zui suk mai zel, i naupangte leh khangdawngte om ahihman un, amau ziak leh zar a, khosak leh gamtat ah i pilvan petmah diing uh ahi. Pathian mai ah i mohpuakna uh sang lawtel ahihnam phawk ni.

**Naupangte tung ah mohpuakna:** I naupangte leh khangdawngte, alungsim uh haatlaitaka, amuh uleh azaakte uh a khuak un hiplut zungzung

hi. Internet leh smartphone-  
 te ziak inleng khovel pilna leh  
 paidan in nawk (influence)  
 petmah hi. Himahleh,  
 sepkihakna dia hangsanna a  
 muhna uh chu, innsung leh  
 khotaang a piichingte gamtat-  
 khohei ah ahi. I naupang  
 leh khangdawnge leng thil  
 hoihloute mah in hiipzaw  
 ahinna ah, piichingte hon en  
 ua, hon sim ua, thil hoih hih  
 dia hanthawanna ana muh kei  
 uleh, chimoh uhi. Huchi in,  
 amau lemtangdan leh nopsak  
 dan in ana gamtaang sek mai  
 uhi.

Nu leh Pate'n tate tung a  
 i mohpuakna uh salam a  
 apoimohte uh suktuah kia hilou  
 hi. Khalam leh tangtawn hinna  
 a neihna diing ua i mohpuakna  
 uh thupipen ahiman in, i  
 chihtak uh poimoh hi. Nu leh  
 pate kia hilou in Khotaang a  
 piichingte'n leng i naupang  
 leh khangdawnge tung a  
 mohpuakna liantak nei ihi  
 uhi. Pathian in tu mahmah in,  
 i gamtatnate uh kigenchian  
 diing in hon sawl bang hitaleh,  
 bangchi bang in i kigenchian  
 di ua? (Deuteronomy 6:6-7;  
 Paunaakte 6:22; Sam 78:4-6;  
 Matthew 19:14)

**Khosak nuamzaw, hinkhua  
 zatdan sezaw:** Pathian in  
 nasatak in i hindan uh hon  
 dopkang sak tou zel a, lam  
 tuamtuam ah simseng louh  
 in vualzawlna tampi in hon  
 vuk hi. Toupa'n Amah biakna  
 dia dinmun nuamtak a hon  
 vualzawl ahihnam theilou in,  
 salam lunggulhna hihbuchinna  
 di khawng in dikloutak a zang  
 in, i mangthang gawpta uhi! Poi  
 lua! Amau chiindan ahizhak  
 in 'Diwali Gift' khawng hon pe  
 sek uhi. Ahialah, hon piak uh  
 ngailou ahindan theisak thei i  
 hi uhi. Huchia 'Diwali Gift' hon  
 piak teitei uh sanlouh nuam i  
 sakkei leh chu, lungsim hon  
 kam a omkei nakleh asiatna  
 om in i ngaihtuah kei hi.  
 Himahleh, Diwali gift ngen leh  
 sai khawng a va buai hetlouh  
 hoihzaw diing hi. Khristian  
 etton tak hilou phetlou a, mi  
 puukna vanzat dia Setan in  
 hon zat hihkhak theih hi.  
 Laisiangthou in, Tita 2:15 ah  
 "... Kuamah in nang hon musit  
 kei uh hen" chi hi. Pilvangtak  
 a, thuumkawm zel a, amau  
 sahkua chiindante toh kisai  
 a, ei apat lam-et neitheilou uh  
 ahihnam uh i theihsak ngam  
 a poimoh hun leng hon tung  
 diing hi.

Khristian hihna ah, gingleoute lak a, amau tawndante i va koppih theilouhdan i gente khawng zuih ziaak a milak ah nuam hetlou kha diing hi. Ahia lah, Jesu nungzuihna ah, anuamlou i tuah sunsun uh hiai khawng hi lel tadih ahi. Amau tawndan simmoh saklou a, huaite zui dia hon kankuah uh ngailou ahihlam en kitheih in, apoimohdan dungzui in amau le theisak le'ng, theisiam mahmah zel uhi. Jesu nungzui taktak i hihleh, tanchinhoih puangzak di a mohpuakna piak a i om dungzui in, hiai gingleoutute lak a sepna munte ah leng huai mohpuakna pen i taksuah diing uh hizomah lai hi, amau tawndan va koppih mawk lou in!

Kolossate 2:8 ah, i Laisiangthou in, khovel tawndan leh mihing thugusiahte'n hon gallaak

louna dia pilvang ding in, a bung-a chang ah muhtheihdi'n hon na hihkhol ahihman in Pathian' Thu ah kinga zaw le'ng i hih ditak uh hihkha kihi diing hi.

Khristiante'n Pathian i biakna diingdan uh ahihle, kithoihna hing leh siangthou leh Pathian lungtuak dia i pumpi uh i kilatkhiak diing uh ahi. Hiai khovel dan bang a omlou a Pathian deihlam a hoih leh, lungtuah huai tak leh, hoihkim, i theihel theihna di ua, lungsim thakpu a, kikhek danglam a i om zawk diing uh ahi (Romte 12:1-2).

Toupa'n simtute tengteng Amah deihlam telzaw thei diing in, hangsanna toh hon thuum chiat hen, Jesu Khrist min in. Amen. ■

## KIPATHU GENNA

Nu Ngaikhanching leh a innkuan, Mission veng, Mimbung te'n EBCC Gilgal, Mimbung saptuamte a ding vanzat poimoh mahmah Generator hoih mahmah athak hon pia uhi. Saptuamte kipak petmah ka hihman un hiai KTZ tungtawn in ka kipahna uh ka hon taklang uhi. Thupina Pathian in tang hen la, Nu Ching leh a inkuante a vualzawlna i ngetsak hi.

- **Upa Khamsianthang**, Secretary, TBUC  
*EBCC Gilgal, Mimbung*

# BIBLE STUDY



**Pastor Khamkhanchin Ngaihte**, Local Pastor, EBCC Zion

**Text : Ephesate 4:1-16**

**Thupi : SAPTUAM - KHA A KIPUMKHATNA**

**T**humasa: Ephesa Laikhak I sinna ah a thu (theory) I zouta a, tukha apan in a tak (practical) a lut ihi ta uhi. Khenpi khatna zou in, tu in khenpi nihna pan ihi uhi. Tutung in bung 4:1-16 pansan in saptuam a kipumkhatna tawh kisai enkhawm le chi ihi.

**Bung 4:1-3. Kipumkhat dia hasotna 4:**<sup>1</sup>*“Huaiziak in noute sap a na omna utoh kikhom a khosa ding in kei Toupa a hentapa in ka hon ngen hi.* <sup>2</sup>*Kingaihniamna leh migitna tengteng, kuhkaalna toh, itna a kithuakzou chiat in,* <sup>3</sup>*lemna kha a kipumkhatna vom tinten ding in.”*

Khrist a dinmun leh hihna thak a neih toh kituak a Ephesa khua a gingtu mimal leh a pawlpi (saptuam) te kipumkhat ding in Paul in hasuan hi. A mawkna a kipumkhat dia chouna bawl hilou in, Jesu Khrist a hun paisa, tulel, leh tunung a a dinmun thak leh hihna thak uh pansan a kipumkhat ding a hasuan a hi.

**“Huaiziakin”** kichi thumal poimawh mahmah ahi. Ephesa laikhak khenpi nih in khen

theih hi. Khenpi khatna (bung 1-3) ah Paul in gingtu te'n Jesu Khrist a hihna thak leh dinmun thak I neih uh hamphatnate hon sut hi. Khenpi nihna (bung 4-6) ah tua hihna leh dinmun thak tawh kituak a hinna (practical living) hon sut hi. Paul sinsakna ah, thugin/ doctrine dik in Khristian hinkhua dik gahsuah ahi chih akilang hi.

**“Sap a omna toh kikhom a khosa”** bang genna hiding ahia? “Sap a omna” (calling) in bung 1-3 sung a kigen gingtute Khrist a khalam dinmun leh hihna thakte genna ahi. Jesu Khrist ginna tungtawn a Pathian ta hihna, Khrist a pumkhat suahna, theihpihtu hihna leh saptuam kemtu hiding a sapna ichihte ahi.

“Kikhom a khosa” (worthy) in “kibukkim sak,” “kituaksak,” chih genna a hi a, Khrist a a hihna uleh dinmun thak utoh kituak a a khosak ding uh gen ahi. “*Toupa a hentapa*” chi a Paul ahong kigena in Ephesa gingtute kiang a sapna toh kituak a hing gingtute ading in aman piak ding om ahi chih sinsak nuam hikha ding hi.

Tang 2na ah, sap a omna toh kituak a khosa gingtu hinkhua tuh midangte tawh kizopna chidam ah ahong lang hi chih Paul in taklang hi. Khristian leh Khristian loute kibatlouhna lianpen tuh Jesu Khrist ahi. Sap a omna tawh kituak a hinna in kipumkhatna tun a, kipumkhatna om theihna dingin a nuai a hinkhua/lungputte a lou theilou ahi chiin Paul in gen hi.

**Kingaihniamna (humility).** Paubul ah “lungsim niamlak” chihna ahi a, a kikalhpih thumal tuh *kisaktheihna* ahi. Lungput genna thumal ahi a, Khristian hinkhua kibulphuhna dia poimawh ahi. Kingaihniamna in mihing mel hon putna tuh Jesu Khrist ah ahi (Phil 2:1-11). Amahmah in, “...thunuailut tak leh *lungtang*

*kingainiamtak* ka hi...” (Matt 11:29) achi. “Kingaihniamna tengteng” chih in hunkhat leh munkhat hilou in hunteng leh munteng a kingaihniamna ahi a gen. A kikalhpih thumal kisaktheihna ichih khelhna masa pen ahi a, khelhna dang te tuh kisaktheihna gahsawn ahi uhi.

**Migitna (Gentleness).** Migitna ichih nunnemna/zaidamna ichih tawh a gen kibang ahi a, a gennop tak ah, *lungsim chidam* genna ahi. Kingaihniamna in migitna tun hi. Bible a kigen migitna tuh Khasiangthou thununna nuai a hinna ahi. A hiloulam (negative) ah phuba lak chinglou hinkhua genna ahi. Hoihna a gilou zawhna tuh migitna kilatna khat ahi (Rome 12:21). Migitna tawh kikalh (opposite) tuh hiamgamna, huhamna (brutality/rudeness) ahi.

**Thuaktheihna (patience/long suffering).** Kingaihniamna leh Migitna tawh kizom, leh hiai tegel apan a hong kakhia tuh kuhkalna ichi hiam thuakzawhna ahi. NIV Bible ah, “...be patient, bearing with one another in love” achi a. “Itna a kithuakzou tuah chiat in” chih

pen ama a thuaktheihna chih hihlchetna dan a bang hi. Paite Bible (BI) ah, "...lungduaitak a itna a kithuakzou tuah in om un" achi. Thuaktheihna tuh hehna/lungtomna tawh kilehbulh ahi. Lam-etna ziak a tawpsan pah lou, hehna leh thangpaihna suah khe pahpah lou a kidek theihna ahi. Abraham in thuchiam angh nung kum tampi thuakthei tak a ngak in thuchiam a ngah hi (Gen 12:2; 13:16; Heb 6:15). Ngakzawhlouhna (instant gratification) ziak a siatna I gam ah thupi mahmah hi.

***"Lemna kha a kipumkhatna vom tinten ding in"*** chih in lemna khauhual zang a kipumkhatna gakkip ding chihna bang ahi. Kipumkhatna ding lampi sialtu poimawh mahmah tuh kilemna ahi. Gingtute lak a kipumkhatna a omna ding in gingtute mah in mawhpuakna nei uhi. Kipumkhatna ichih dengdel (delicate) mahmah ahihman in kepbit teitei ding ahi. Hiai kipumkhatna humbit a, kep bit gige ding ahi.

**Bung 4:4-6. Kipumkhatna kingakna 4:<sup>4</sup>***"A hon sapna pen lam-etna mun khat a sap na hih*

*mah bang un pumpi khat leh Kha khat kia a om hi. <sup>5</sup>Toupa khat, ginna khat, baptisma khat, <sup>6</sup>bangkim Pathian leh Pa khat kia a om a; amah bangkim tung a om a, bangkim musuak leh bangkim sung a om ahi."*

Sap a omna tawh kituak gamtat khohei in kipumkhatna a tun hi. Tua kipumkhatna tuh bangmah dang a kinga hilou in, Jesu Khrist a kinga ahi hi. A pawlam a kipumkhatna tuh a sunglam a kipumkhatna gah ahi. Kha a kipumkhatna in sa a kipumkhatna leng tun hi. Thumal "khat" chih 7 veitak hon gen tuan a, kipumkhatna a gen-ot nopna hiding hi.

***"Lam-etna mun khat a sap."*** A thumal kivolhdan ah hun paisa a thiltung genna (past tense) ahi. Juda leh Jentelte, hun paisa a kigamlapi a omte, Jesu Khrist ah pumkhat suak in huangsung khat ah omkhawm ta uhi (1:23; 2:16; 3:5-6). Juda leh Jentel namte pumkhat (hihna thak)a suahna uh tuh Jesu Khrist ginna (hotdamna) tungtawn kia in ahi. Huaiziak in, hiai a sapna kigen in hotdamna a kaww hi. ***"Pumpi khat"*** in Khrist pumpi, huai tuh, saptuam a kaww a, ***"Kha***



**khat**” in Khasiangthou a gen hi. **“Ginna khat”** kichi in hotdamna ding a Jesu Khrist a ginna uh genna ahi a, amah kia ginna ah hotdamna om hi. **“Baptisna khat”** kichi Jesu Khrist ginna leh amah tawh kizopna genna a gingtu tuiphumna genna ahi chih tuh hihhchiantu tamzawte pomdan ahi. **”Bangkim Pathian leh Pa khat kia”** chih in thil tengteng kigawmkhawmna ichi hiam kipumkhatna phungpi Pathian ahihna taklang hi. Leitung ah pathian tampi om mah le uh “Pa” kichi lou uhi. Van a Pathian kia mah Pa chi in kism hi.

**Bung 4:7-10. Gingtu teng kiang ah hehpihna piak ahi**  
*“Himahleh, Khrist thilpiak tehna bangzel in hehpihna I kiang chiat uah piak in a om hi.<sup>8</sup>Huaiziak in ahi, tunglam a akahtouh lai in matte tampi a pi a, mihingte kiang ah leng thilpiakte apia, a chihna.<sup>9</sup>Huchi in, a kahtou chih leimun nuainung pente bang a ahong suk masak phot keileh bangchi ahita dia le? <sup>10</sup>Hong suk pen thil tengteng ahidim theihna ding in, van tengteng tung pek a kahtoupa mah ahi.”*

Kipumkhatna kingakna (4:3-6) a gen zawh in pumpi kahiang tuamtuamte chituamna zang in pumpi kipumkhatna hon gen hi. Hiai tuh, pumpi kahiang tuamtuamte kiang a Khrist in hihtheihna leh thawnpiak (gifts) tuamtuam a piak tawh kisai ahi. Tang 7 ah, gingtu mimal mal kiang ah Pathian gam nasepna ding in thilpiak (gift) piak ahi chiat uh chi ahi. Hiai thawnpiak tuamtuamten pumpi kahiang tuamtuamte chituamna lam gen hilou in, pumpi khat a khantouhna ding leh akipumkhat semna ding tupna ahi. Saptuam sung ah thilpiak tuamtuam a om ua, himahleh, tuate’n tup kibang khat a nei ua, huaituh, pumpi kilamtouh leh khanna ding ahi. Tang 8 ah gingtute kiang a Khrist in thilpiak a piak theihna dan Sam 68:18 pansan in hon taklang hi. Sam 68:18 pen Khrist tunglam a akahtouhna tungtawn a thilpiakte piaktheihna thuneihna nei ahih kilatna ahi chi in McArthur in hihhchian hi. Tang 9&10 na a “a kahtou” chihleh “kumsuk” chihte’n a gen I Toupa Jesu Khrist ahi. Mikhialte tan dia mihing melpu a ahong paina masa pen

(incarnation) leh a sihzawh a Apa kiang laktouh a aomna pen genna hiding a pom ahi. Hoehner' hilhchet dan in, Jesu Khrist sihna in kha gilou nasepna leh mial thilhihte apan suahtakna leh a gingta kuapeuh a dia tatkhiaakna hon tun a, tua tatkhiaakna omgingtute kiang ah Khrist in a na sepna ding in thilpiak apia hi" achi pomhuai mahmah hi. Sihna tung a a vualzawhna tungtawn in Khrist in a saptuamte kepna ding a poimawh thilpiak tuamtuam gingtute kiang a piaktheihna thuneihna a nei ahi.

**Bung 4:11-16. Khat le khat ki lamtou tuah ding a Thopna**  
 Bung 4:11-16 sung ah Paul in gingtute kiang a thilpiak piak ahihna in a tup ichi hiam, a ziaak ahon taklang a, huaituh, nasem dia thopna ahi.

4:11-12. <sup>11</sup>"Huan, khenkhatte sawltak hiding in, khenkhatte Zawlnei hiding in, khenkhatte tanchinhoih gen ding in, khenkhatte pastor hiding in, khenkhatte sinsaktu hiding in apiahi.<sup>12</sup>Huaituh misiangthoute thopna ding, nasepna sep na ding, Khrist pumpi lamtouna ding in."

Tang 11na a nasepna (ministry) adia a tuam biik a sapna leh thopna kigen te "Sawltak... Zawlnei...tanchinhoih gen ding...pastor...sinsaktu..." ichihte Khrist pumpi lamtouna ding tupna a saptuamte kiang a piak ahi uh. Amau ut bangbang a sem hilou in, Pathian in a thopna a piak bangbang a sem ahi uhi. "Zawlnei" ichihte Thukhun Lui hunlai a Zawlneite (prophets) genna hilou in, saptuam sung a Pathian' Thu a zak bang uh midangte kiang a sinsak sawn tute, Pathian sik leh tang a kizang mite genna ahi. Pastor ichih Greek a *poimen* kichi apan lakkhiak ahi a, a gentak belamchingtu (shepherds) ahi. Huaiziaak in, pastor nasep tuh Pathian thutak a belamte vakna (feeding), kepna (care), humbitna (protection) leh makaihna (leadership) ahi. Pastor tengteng sinsaktu ahi ua, himahleh, sinsaktu teng pastor hivek lou uhi. Saptuam sung ah Pathian in thilpiak tawh a thop biik mi (gifted persons) te a tung a te ahi ua, saptuam khanna ding a piak ahi uh.

Tang 13-16 sung ah Paul in saptuam sung a thilpiak

tuamtuam omte' tungtawn a Khrist pumpi kilamtouhna in a tut ding kipumkhatna gen dan tuamtuam in hon gen hi.

**Ginna leh Jesu Khrist theihna a kipumkhatna (v13a).**

*“Huaituh ginna leh Pathian Ta theihna lam a thukituak a...”* Hiai a ginna kigen in a gennop tak ahihleh hotdamna tawh kisai hilou in Khristiante thugin (doctrine) tawh kisai ahi. Pathian Ta theihna chih in Khrist tawh kizopna leh kithuahna (fellowship) tungtawn a kichimatna lam a kawh hi.

**Khalam pichinna (v13b).**

*“Khrist tangchinna bang a I vek ua I om masiah a ding..”* Gingtute hinkhua a Pathian thildeih tuh gingtute Khrist batna lam a pichin lam manawh ding ahi (Rome 8:29). Heutu leh makaite kia hilou in, gingtu tengteng in Khrist bat semsemna lam manawh ding tuh Khristian hinkhua in na tup ahi. Khalam pichinna ding a poimawh mahmah thil 2 Paul in a hon gente: 1), *“thuhilhna huih chiteng (sinsakna diklou) a a langlang a sep leh naupang bang a mutleng i hihnawnlouhna ding un”* (v14), leh 2), *“itna a thutak gen a, bangkim a amah lupen,*

*Khrist ngei a I khanlet zawkna ding uh ahi”* (v15). A masa pen in I pumpelh ding a gen a, a nihna in I hih/chiin ding a gen hi. Thutak I gen ding ahi a, himahleh, itna ziak a/tawh gen ding ahi achi a, chiamtehhuai tak ahi.

Tang 16 ah, gingtute kipumkhatna tuh Jesu Khrist ahia, amah a kizop ding bangtak a i kizop chiang in Khrist pumpi lamtouw in a om chiin agen hi. Khrist a kipumkhatna in thil ahitheih a, gah a suang sek ahi. Kipumkhatna kipatna bulpipen tuh Jesu Khrist ahi. Eite leng Khristian ihihna sang a hon gawmkhawm zaw ding thildang bangmah omlou ahi.

**ZAWHNA:** Tukha a I sinna sung ah Paul in Jesu Khrist tungtawn a kipumkhatna a uang gen hi. Pathian' ta ihihna ziak a kipumkhat ding a sapte ihi uhi. Saptuam sung a mizat theih tuamtuam piak a I omte'n a tup gingtute nasem dia thopna ahi a, tua nasepna in Khrist pumpi a khan ding bang a khangsak in Pathian min thupi pahtawi in a om hi. Simtute, Pathian ta ihihna tawh kituak in I khosa hiam? Toupa'n hon vualzawl chiat hen aw. ■



# Gammial Aw

*“Khovel tengteng ah pai unla, Thilsiam tengteng kiang ah Tanchin hoih hihl un” chi a thu hon pia i Toupa Jesu Khrist min in chibai aw! Pathian gamna sem a kalsuanna a chang in hat hehu a kilanglou bang in om mahle hang a hunhun a honpitu Pathian hing nei i hi chih mun theih in om zel a kipahhuai i sa mahmah hi. Khamangthang mai dingte itna leh lainatna ziak a, hihtheihna zahzah na suah a thumna leh thilpiak a na pang gige saptuam mite kipiakna thupi i sa mahmah a, amaute kipiakzohna ziak a mavangtak a semtute’n field a gahsuah leh lohchingtak a semzom theizel ahihdan uh muh theih a omte ziak in kipahtu gen ni. Field i neihte leh pawldang toh i sepkhawmna a Gamkuan semtute a hunhun a Khasiangthou in a thop a, gahsuah leh tuipai semtute hong hihtheihna ding un thumpih zel ni. Saptuam mite pankhawmna ziak a Toupa’n gah hon piaknawn hiai anuai a te enkhawm nawn ni.*

## A. HIMALAYAN MISSIONS FIELD

### KIPAHTU GENNA LEH THUMNA DINGTE:

1. Toupa’n thumtute leh semtute kalsuanna tungtawn in gingthak 10 (sawm) leh baptisna tangthak 5 (nga) hon piak nawnte ziak in kipahtu gen ni. Toupa vanzat a pangkha semtute leh Toupa vanzat hiding a a kipiaknate uh ziak in Pathian kiangah kipahtu gen ni. Gingthak leh baptisna tangte khalam kalsuanna ding uh khasiangthou thopna leh makaihna ngetpih ni. Khateng a field tungtawn a i sepna gah tampi muh ding Toupa’n hon piakzelte ziak in kipahtu gen ni.
2. Nepal EBC amah khe a ding a kivaihawm ding a kisakkholhna paizel ahihlai in amau pau mah a asim ua a zuih ding uh Byelaw bawlina in masawn zel hi. Tukum sung a zoh ding a field in panlakna nei ahihman in, hunchiam sung a fel leh kizentak a hon zoh theihna ding un thumpih ni.
3. Khudunabari Biakin kibawl zohsiang hita a, a honna leh latna August 26, 2024 a neih ahih hun in biakinn honna a tel

ginglou mi khat in Jesu hondampa ding in sang hi. Kipahthu gen in, Khrist a ding a muanhuaitak a hong hin theihna ding in thumna in delhzui ni.

4. Field in NEBC Saptuamte intuan ding a kisakkholhna nasatak in paipih lel a, mahni khe a ding diing ahihna toh maban a tuailaite lak mahmah ah Saptuam sunga a biktaka Biakna hunte a zattheih ding heutu sekkhiak ding tupna in Music Camp/Training October 21-26, 2024 sung Birtamode mun ah neih in om ding hi. Hiai hun ah sinsaktu in Mr Thangbiaklal Valte, Music Promoter, EBC pang ding hi. Sinsaktu ding leh a telding mite thumna in phawk ni.
5. NEBC Indigenization Policy pailel toh kisai a makai ding sekna paitou zel hi. Tukum sung ngei in field in mun nih; Ektin (singtang) leh Pathari (phaizang) ah kisinsakna November 14 – 17 sung neihsawm in panla lel uhi. Hiai hun a tel ding Saptuam a heutu makaite leh semtute ban ah sinsaktu dingte thumpih ni.
6. Pathian ompihna toh Himalayan Missions Field, NEBC sung a semtute'n tuni chiang in kiim-le-kiang leh gingloute apan douna bangmah tuaklou a paitou theizel ahihman un kipahthu gen ni. Hiai bang hun manphatak lak ah semtute'n kuhkal zawsem leh chitakzaw sem a khamangthang zonkhiakna nasep hon sepzom zel theihna ding un thum ni.

## **B. DHEMAJI MISSIONS FIELD**

### **KIPAHTHU GENNA LEH THUMNA DINGTE:**

1. Toupa'n Namgharia saptuam apan gingthak mi 3(thum) hon piakte'n August 21, 2024 in Pastor S Thangbiakmang khut tungtawn in baptisna tang ua, Bitarbacha mun a gingthak mi 5 (nga) te'n leng August 28, 2024 in Pastor S Thangbiakmang khut tungtawn mah in baptistna tang uhi. Kipahthu gen in, amaute'n Khrist a ding a muanhuai hinkhua hon zat ua, tunung a field a ding a khuam muanhuai ahih theihna ding un thumna in delhzui ni.
2. Lachangaon leh Pityang Chapori mun ah gingloumi Pathian thu lunggulh semtute'n a vanaih theih ding uh piak in om zel hi. Kipahthu gen in, semtute'n Pathian thu lunggulh houlimpik a neihte uh lamzangtak a hon sutzop zel ua, gah

- kipahhuaitak muh ahih theihna ding in thum ni. Counselling neihipih a omzelte'n Jesu Khrist a Lal leh Hondampa ding ua hon pom theihna ding un thumna in phawk zel ni.
3. Dhemaji Mission Field a ding a masapen hiding in September 3-6, 2024 sung Eco Camp Kareng Chapori mun a Papi Gospel Camp neih in om a, Pastor S Thangbiakmang leh Evan H Jamkhanmangte thugentu in pang uhi. Pathian ompihna toh programme lamzang leh lohchingtak a zoh in om thei hi. Hiai Camp ah tel Papi 33 te'n a thuzakte uh a hinkhiakpih theihna ding un thumna in delhzui ni.
  4. Field ah semtute leh gingtute lak ah avangkim in damlounhna tuak om thei zel hi. Pathian in tua bang a damlounhna leh taksa hatlounhna tuamtuum nei gingute leh semtute chidamna hoihtak a piak zelna ding in thumna in phawk ni.
  5. October 9-12, 2024 sung Eco Camp Kareng Chapori mun ah Youth Meeting chih minvuah in field sung a Tuailai Camp neih in om ding hi. Hiai hun in thu-le-la a kitaitehna banah taksa lam a kisukhahhna tuamtuum leng om ding hi. Programme bangmah buaina omlou a lohching tak a zat ahitheihna ding in thum ni.

### C. HOJAI MISSIONS FIELD

#### KIPAHTHU GENNA LEH THUMNA DINGTE:

1. Hojai & Lanka Station pansan a naupangte lakah home tuition tungtawn a semtute'n a sepna uh tuni chiang lamzangtak in paizom thei zel kipahthu gen ni. Lanka Station pen munthak himahleh tu in Kashipur mun ah Skul naupang mi 6 toh tuition bulpat in om theita hi. Tuition tungtawn a naupangte lak a tanchinhoih chi tuh ahih theihna dia semtute'n panlakna lohching leh gahsuah ahihna ding in thumpih ni.
2. Tanchinhoih chi tuh ahitheihna ding a Field a semtute'n a gammite lawmbawlina leh lamtuamtuum a pan a laknate uh vuaksuak lou a Pathian deihna bang kalsuanna gahsuah lohching ahih theihna ding in thumna in delhzui ni.
3. Field ah gingtu tam naikei mahleh Pathian in kep ding a hon piak tamloute'n a ginna uh kipsem a hon let ua, amaute tungtawn a gingloute lak a tanchinhoih puanzak ahih theihna ding in thum ni.

## **D. GOALPARA MISSIONS FIELD**

KIPATHU GENNA LEH THUMNA DINGTE:

1. Field a semtu innkuan nih omte'n Pathian ompihna tang a tuni chiang amau sepna mun chiat a kal suanzom theizel ahihman un kipathu gen ni. Pathian ompihna tang a khasiangthou thopna tamsem toh lamzang leh manphatak a hon sepzom zel theihna ding un thumpih ni.
2. Evan NK Naulak taksa hatlounhna tuamtuam a neihte damsiang taktak theilou a om ahihman in, hatlounhna a neihte apan hatna leh damsiangna a neihna ding in thumpih ni.
3. First Aid Project Ministry chih minvuah a semtute'n a sepna tungtawn ua nasepna in masawn zel ahih ban ah kha paita sung in damlou tuamtuamte kiang ah damdawi hawmna nei thei uhi. Kipathu gen in, Ministry gahsuah ahih theihna din thumna ah delhzui ni.
4. Semtu Missionaryte'n maban ah sepding plan bawlsa a neihte uh buaina omlou a hon sepsuah zel theih ua, Project tungtawn a a gammi houlimpihsa a neihte uh toh kizopna hoihtak nei a tangthupha amaute lak tangkoupah ahih theihna ding a hun manpha a hihna ding in thumna in phawk ni.

## **E. KAMRUP DISTRICT, ASSAM**

KIPATHU GENNA leh THUMNA DINGTE

1. Kamrup Area a semtute'n Pathian ompihna toh daltu omlou a tuni chiang semzom thei zel uh kipathu gen ni. Amaute'n Chaygoan, Loharghat, Dhupdhara, leh Bamunigoan area-te ah sem ua, gamthak a lut a sem ahihman un, Pathian ompihna toh daltu omlou a lohchingtak a hon sepzom theihna ding un thumpih ni.
2. Loharghat pansan a semtute sepna mun Satpur khua ah Mr. Lubul Das leh inkuante ban ah Mrs. Anjali Rabha (Das) te'n Pathian thu ah lunglutna nei uhi. Semtute tungtawn a Toupa'n amaute hon piakna ding in thumna in delhzui ni.
3. Bamunigaon leh Dhupdhara pansan a semtute'n Ministry a neih uh sunzom thei zel uhi. Amaute'n kalsuan a houlimpih theih ding uh a hunhun a Toupa'n mi hon pezel ahihman in



kipahhuai i sa a, tua bang mite'n semtute tungtawn a Khrist hondampa ahih dan a theihna ding un thum ni.

4. Dhupdhara Station pansan a semtute'n kimawlna tungtawn in mite toh kizopna bawlthei zel ahihman un manpha i sa hi. Maban a mite toh kizopna hoihsem kimawlna tungtawn a neihsawm in panla lel uhi. Panlakna a neih uh hong taksuah a kimawlna tungtawn a a gammite toh kilawm bawlna leh kizopna kiptak hong omna ding in thumna in phawk ni.

## E. PAWLDANG TOH SEPKHAWMNA

KIPAHTHU GENNA leh THUMNA DINGTE

1. Toupa'n WEC pawlpi toh sepkhawmna ah tuni chiang lamzangtak a semkhawm a kal hon suankhawm sak zel kipahtu gen ni. September khabul in Nungak nih; Miss Ruby Lianroumawi (Diphu) Kazakhstan gam a sem ding in kuankhia a, tua bang mah in Miss Chingngaihman (Bungmual) leng Indonesia gam a sem ding in kuankhia hi. Amaute Pathian ompihna toh chidamtak a tung in, tu in University ah kai in pausinna pantheita uhi. Pathian ompihna toh lamzang leh gahsuahtak a kal hon suanzom ua, ginglou mite lak a Khrist mel tangsawn saktu a hihtheihna ding un thumna in delhzui ni.
2. WEC Candidate Orientation, Shillong ah September apan November kal nihna tan daihdng neih in om lel hi. Hiai orientation ah NDPN nuai a mi thum; Miss Zamngaihlun (Vaalveng), Mr. Thawngkhanding (Khominthang) leh Mr Birsing Tisso (Karbi Anglong) te leng kihel uhi. Pathian ompihna tang a, orientation lohching leh manphatak a hon zoh theihna ding un thumna in phawk ni.
3. OMF toh sepkhawmna a Thailand a Gamkuan Rev Khaikhuphang leh innkuante khanih vel innlam (Lamka) a Home Assignment zang a hong pai, October 12, 2024 chiang in a sepna mun uh Singburi Province, Phromburi District, Thailand ah kiiknawnta ding uhi. Pathian ompihna toh chidamtak a a sepna mun uh a tun ua, gahsuahtak leh lohchingtak a hon sepzom theihna ding un thumna in delhzui ni. ■



# DORCAS *Corner*

## **DORKA KHAWMPI LIAN 43NA REPORT TOMKIM:**

A chitna thupi leh itna zuaungeilou a honkem Pa Pathian ziak in kipahtu gen in amin i phat masa hi. October -2024 tanpha hon makaih Hondampa Jesu Khrisat min in chibai aw. Tutung in Dorka Khawmpi Lian 43na toh kisai report tamlou i taklang ding.

Heutute phasakpihna toh Central Dorcas Sub Committee (EBC) makaihna in Dorka Khawmpi Lian 43na September 13-15, 2024 sung Gospel Centenary Hall ah Thupi: “KIPUMKHATNA” zang in kinei hi.

I saptuam sung a Division 6 omte, Khopi Saptuam 13-te banah Mission field (Himalayan, Dhemaji leh Assam) a kipan in anasepdan uh report ngaihnhopuai mahmahte kingaikhia hi. A hong hoh theiloute'n leng report form a gelh thoh leh Audio a hon khak uh simkhiakna leh ngaihkhiaakna neih a hi. Report-te a kipan in Pathian hon ompihna leh maban a pan naksem a lading in tha hon guan mahmah hi. Thupi zang a thugenna hunpi nih Rev. S. Vung Minthang, General Secretary leh Rev. K. Kamchinkhup Dircetor of Missionste'n zang uhi. Seminar hun khatna Thupi: “Khristian Numeite' Dinmun Saptuam leh Khotang ah” chih Lalhlimpuii Associate Professor in zang in, seminar hun nihna Thupi: “Khristian Numei Insung mohpuakna leh Sum Zeekdan” chih Vungkhawhching Account Officer in zang hi.

Khawmpi hunsung in hun zek 7 om a, tua hunte ah TBDC-tengteng pangkha vek theikei mah le'ng a tamtheipen in hunkhat bek a panna neihtheihna ding in Lamka North leh South Division sung a te seh a hi a, amaute'n amau tanmun chiat phatkhawmna pitu, Lapawl sading, usher ding, hunkem ding leh gelhluttu in a hihtheihna zahzah un pang uh a, manpha in muh anuam hi. A hampaha Pasian mite toh kikholh khop liailiai mahmah, nop a chih in nuam e! chih la hon phawk sak mahmah hi. InteeK

Saptuam dia mohpuakna piak aom EBCC, Elim Veng, a TBDCTe uh feldan muh in hon thathousak a a tung uah kipahna alian in Pathian min in kipahthu hiai ah i taklang thak hi. Lapawl sa a pite vual, nute vual hong ding khezelte ka muh chiang in thupina gam hon paisansate leh Dorka heutu masate hon ngaisak in kipahna mittui hong pakkhe khasek hi.

### **Thugen tungtawn a chiamteh a hinpih dingte:**

- Toupa honsapna toh kikhom a hinkhua zang ding, kipumkhatna mimalchiat a kipat chiat ding.
- I kipumkhatna in buaina tutlouh ding a, hon kingainiam sak ding, hon ki-itsak ding a khat leh khat Khrist sung ah Kha (Jesu Khrist a pan) leh khat a gam leh nam bawl ding a Pathian deiham a kilem ding.
- I kipumkhatna ding hon dalthei peuhmahte koih mang ding – kisaktheihna, mi demhatna, mahni kihoihsaknate.
- I kim a khovel en in kipumkhatna kalbi suan ding a, Jesu min a kal khat bek, thil neuchik khat bek sem ding. Ei buaina sang a mah lian zawtham ahi chih phawk gige ding.

### **Seminar toh kisai chiamteh thak ding:**

Seminar paper neite'n sim thakthak in ei leh ei kisin le uthuai i sa hi. Hiata chiamteh thak ding in report lai ni.

- Khotang sianthouna ding in nu te'n mohpuakna i nei a, insung ah i tate niin mawkpaih lou ding in hilh chiatchiat ni.
- Social media a ei tate'n comment bang apia ua, IG lam ah bang chibang a tumthuk ahi ua chih velthak a a hoiham kia zang ding a amaute hilhdng. Ei Nute mahmah bangtan a kidiah kha ihia kivel thak ni.
- Nute'n insung nuam bawl ding a kipathak ding, In a om kisin in tate ompih kisin ni. Eimah In nuamsa ding, inkuanpihte'n leng nuam a sakna ding ua inkuan bawl ding.
- Inkuan maitam doh a Toupa phatna insung suahsak ding.
- Inkuan sum zatdan kivelthak a, I sum muh toh kikhom a sum zatdan siam kisin ding

Khawmpi hunsung teng Pathian in khohun nuamtak, lum lah lum lou, vot lah votlou a nuam hun lel in hon bawlsak a Toupa hoih hina lawmlawm e, thupina i pia hi. Khawmpi zang dia hong

pai mipi numei kialou leng tam mahmah in EBCC, Hebron Biakin ah leng 15 September, 2024 (Nipini) in leng dim mitmet hi. Hiai tengteng a a thupina hon musak Toupa min i phat hi. Kuapeuh hiai Khawmpi siim kha leh a hunsung a kizangkha tengteng leh a thutak zakha tengteng Toupan khalam vualzawlna hon pechiat hen. ■



## YOUTH *Corner*

### THANLON DIVISION KHUALZINNA REPORT:

Central Baptist Youth Fellowship leh Central Music Sub-Committee kithuah in EBC Thanlon Division sung August 19 apan in 22, 2024 in khua 4 (NE Tlangnuam, Bukpi, Thanlon leh Phaitong) station a bawl in huai kim leh kiang khua kinai a omte samkhawm in biakkhawmna leh kithuahkhawmna hun zatkhawmna report ka hon taklang hi. Hiai hun in CMuSC lamte lemtanlounha khenkhatte ziaik in a hun kuan in kuamah hong kilang theilou ua Music Promoter kia'n hon zui thei hi.

August 19 in Lamka apan zing dak 7 a kipan khia in NE Tlangnuam tungsuak ding in ka kisa uhi. Vuah a hoih zuk mahmah ziaik in deih bang in ki paitheilou hi. NE Tlangnuam station a nei in BYF Aibulon, BYF Bungpilon leh BYF Daidou te toh biakkhawmna hun kizang hi. BYF Aibulon, BYF NE Tlangnuamte apan in phatna la ngaihkhiaik ahi. Youth coordinator in kalsuanna toh kisai putlakna leh thugenna hun zang hi. Kikhawm zou in Pastor quarters ah houlim kawm in nitak hun manpha tak ka zang uhi.

August 20 zing in NE Tlangnuam apan in Bukpi ka delh uhi. Palkhuang Pastor quarters a singpi dawn in huai apan in ka paisuak ua, Bukpi dak 2 vel in ka tung uhi. Bukpi Station ah Palkhuang apan in tuailaite mi 13 leh Pastorte nupa toh hong telpei uhi. Bukpi Bethelte leng tel ding himahleh kikhop

dingkuan a vuah a hoih zuk luat ziak in hong kisa theilou suak uhi. Kikhop hun in Thangbiaklall Valte, Music Promoter in thugenna hun zanga, Youth coordinator in kalsuanna toh kisai leh mellahna hun zang hi. BYF Palkhuang leh BYF Bukpi te apan in phatna lapawl siam tak a ngaihkhia ahi. Kikhop tawp in Dorca Pawl in Pastor Quarters ah vaitunna leh kithuah khawmna singpi hon dawnpih ua kithuahkhawmna hun manphatak zat ahi.

August 21 zing in Bukpi a seppih schoolpute tenna quarterte vasik kual in thumna hun manphatak kizang thei hi. Huchin dak 10 lak in Bukpi nusia in Thanlon lam manoh in ka kipan khia uhi. Thanlon ah TBUC, BYF, BDF leh School a semtuten thupitak in Pastor quarters ah honna vaidawn uhi. Thanlon station ah BYF Mualpheng apan mi 20 val, BYF Dialkhai apan mi 15 val kipaikhawm hi. Nitak kikhop hun in Youth coordinator in thugenna hun zanga, Music promoter in mellahna leh kalsuanna toh kisai genna hon nei hi. Hiai mun ah lapawl bang kou a kuanlamte'n ka va present thei uhi. Nitak kikhop tawp in Pastor Quarters a houlimna leh kithuahkhawmna hun manphatak zat ahi.

August 22 zing in CES Hosteller, Thanlonte toh hun manphatak ka zangkhawm thei ua, amaute hanthawanna leh thumsakna hun ka zang uhi. Dak 10 vel in Phaitong manoh in ka kipan khia uhi. Phaitong Station a nei in huai a BYF Khajang, BYF Sinzawlte kikaikhawm hi. Phaitong a 'Cross Mual' ah thumna hun manphatak ka va zang thei uhi. Kikhop tawp in TBUC leh TBYP Phaitongte toh local chairman inn ah kithuahkhawmna hun ka zang ua houlimna nuam ahi dia dak 11 lam bang a ging man hi.

August 23 zing dak 6 lak in Phaitong apan kipan khia in Sinzawl ah Pastor in singpi honna dawnpih hi. Songtal, Mualnuam Suangdohte a Pastorte kiang a bang in thumna hun ka zang tou thei uhi. Bit leh damtak in Lamka nitaklam dak 2 vel in ka tung uhi.

Hiai tour program zatna a kipahna genseng louh hi, saptuam mite hon ngaihndan uh, hon lunggulh dan uh leh a hon itna uh

thupi mahmah in ettonhuai mahmah uhi. Thanlon division sung a i semtute phathuai mahmah ua, lamtuamtuam a manphatak leh amau hihtheihna tan ah leng thanuam in kipezou mahmah uhi. Amau hihtheihna khomkhom tuailai te kuhkaltak in ana pang ua, lapawl bang leng a hun bangjel in ana neithe i ua, a om sunsun nasep leh biakna ah kuhkaltak in ana pang ua lungkiatna tampi lak ah leng a panlakna uh thupi in ettonhuai mahmah uhi. Thanlon Division sung a om tuailaite thumna ah phawk zel ni. Report tungtawn in thupina tengteng Toupa'n tang hen. ■



## CHILDREN'S *Corner*

### BCD SINLAIBU PROJECT

Naupangte' sinlaibu thak bawlina paitou zel ah Toupa ompihna toh, kumnawn 2025 a zat ding New Syllabus laibu 4: Beginner A2, Beginner B1, Primary 2 leh Junior 2-te zou thei ding dinmun a i om nawn man in kipahhuaisa in, hon ompih tawntung i biak Pathian min ka phat hi. Tua toh kiton in Junior akipan a nuailam teng in kumnawn in sinlaibu thak tawi ding uhi.

### CONTEMPORARY CHRISTIAN ISSUES (CCI) SEMINAR 2024

Tulai khovel a thiltung tuamtuamte'n naupangte' hinkhua, khalam leh salam nakpitak a hihkha ahi chih phawk in a hong tung ding November 24, 2024 (Pathianni) in EBC Headquarters saina in Gospel Centenary Hall, New-Lamka ah "Contemporary Christian Issues (CCI)" seminar zat ding a gel ahi. Hiai hun ah Lamka South Division leh Lamka North Division sunga tukum a BCD Senior pawl leh sinsaktu tengteng kihel ding chih ahi. Seminar topic leh sinsaktu dingte hiai a nuai a bang ahi.

1. Contemporary Christian Doctrinal Issues ~ Evan. Damkhothang
2. Contemporary Christian Ethical Issues ~ Evan Lianding Guite
3. Contemporary Christian Issues ~ Rev. K Kamchinkhup ■



# Mu<sup>♩</sup>ic *Corner*

## THE 3 DAYS EBC MUSIC LEADERS' CAMP-2024:

Pathian leh Heutute lemsakpihna toh August 27-29, 2024, sung Central Music Sub-Committee & Camp Sub-Committee te malakna in “The 3 Days EBC Music Leaders’ Camp-2024” project lohching leh gahsuahtak in chialpina leh music training program kithuah a kigeel bangbang manpha leh gahsuahtak in kizou siang thei hi. Hiai camp toh kisai report saulou ka hon taklang hi.

EBC Lamka North & South Division sung a local saptuam chih a Music Leaders’ Camp a tel ut-te a ding in Registration form Divisional Superintendent tungtawn in khua chih ah ki hawmkhia a, khua tuamtuan apan tel ding a kingen 80 hong lut hi.

Hiai camp a hun masa ni khat pumlum Evan. Damkhothang & Htp. Rev K Kamchinkhup in chialpina hun leh kivelthakna hunpite zang in camperte lak ah thupukna lathak bang, commitment bawlhak bangzah hiam om ahihmanin Toupa min i phat hi.

Hiai hun a kisinsakte: Worship Leading, Choral conducting, Vocal, Guitar & Keyboard : PPT Design technique: Color combination, text, background leh a dangdang ahi.

Camp a lutzah Gawmkhawm: 71; Keyboard Class: 17; Guitar Class: 29; Vocal, Worship. Leader Technique, Choral C. Technique: 26; Keyboard Class: 17; Guitar Class: 29; Vocal, Worship. Leader Technique, Choral C. Technique: 26

Participation Certificate mi 72 kiangah camp khakna hun ah hawmkhiak ahi. Huaiban ah, Camp toh kisai Assessment form sintute kiang ah hawmkhiak ahi a, huai apan Camp toh kisai feedbackte kaihkhawm ahi. Huai assessment form pansan in feedback tamlou anuai ah i taklang ding.



- Music Camp tungtawn in hotdamna lam thu ah ka phattuampih a kipahhuai ka sa hi. Hiai dan tamsem saitouh zel hoih kasa.
- Music Leaderte a dia hiai bang program kisai/non pankhia ua ka phattuampih mahmah. A hun tua sang in sawt thei zaw leh duhthusam ahi.
- Kha lam salam hon hihhattu ahihman in hiai dan camp saitouh zel hoih kasa mahmah.
- Music zilbeh utna leh siamtak a Pathian minthupina ding a kizang ding ka hihdan ka zilkhia.

Music Leaders' Camp Project – 2024 gahsuah leh lochingtak a hon zohpih a hiai tan a Saptuamte khat leh khat kilamtuah thei leh kisinsak thei ding a honpi a hon makaih Toupa min i phat a thupina leh pahtawina tengteng Amah kiang kia ah i pia hi. ■

---



## EBC Innsung Thu

### **1. MEDICAL CAMP- 1/2024 NGALJANG & SUANGDAI A NEIHNA REPORT:**

Ngaljang leh Suangdai ah August 31, 2024 (Kiginni) in Medical Camp neih in om hi. Lamka apan 5:35AM vel a kipankhia in Singngat ah DS & teamte'n honna vaidawn in camp neihna munte ah leng hon kithuahpih den uhi. Hiai Camp a hoh/Kalsuante: Health Care Board Chairman Upa Dr. VC Pau makaihna in team member (Dr. H Ginthianmung, Dr. V Jamthianlal, Dr. N Thangginmang, Nurse Ngaihlun, Chiching, Upa T Langsanglian, Mr. Jampu, Rev. Nenglian Vualnam)

**Ngaljang khua ah:** EBCC Ngaljang ah saptuam mi inn 17 vel om uhi. School building (saptuam in alam tua Hausa khut a om) pansan in medical camp neih in om hi. Khosung mi tamtak hong paikhawm uh a kiensak ticket la mi 110 pha zou hi. Lamka lam a omte leng hiai medical camp ding ziak in khua ah ana pai sahsauh uhi. Damdawi leng tamkhoptak athawn a hawmkhiak in om hi.

**Suangdai khua ah:** EBCC Suangdai ah saptuam mi inn 14 vel om hi. Biakin compound a school building zang in medical camp neih ahi.

Khosung mi tamtak hong paikhawm uh a, kiensak mi 139 pha hi. Damlou amau a hong kipai theilou gari a honpuak uh mi 3/4 om hi. LSC Chairman makaih in Local Chairman, bialtu Pastor, DS leh school staff te toh staff quarters ah meeting hun khat zat in om a, school maban ding leh saptuam kikepna vai khenkhat houlimna manphatak kinei thei hi.

**Muhdan khenkhat:** Tutung a medical camp neihna khuate ahihleh gam kil- kengkai mun a om, main road in atotkhak louh leh mi nautang kiveivelna mun hikha lou, kho neu chikchikte ahi uhi. Huai khua a om saptuam mite toh kichimatna hun hoihtak ahihman in manpha mahmah hi. Khosung mite'n lametna liantak toh kithaloptak in honna kithuahpih uhi. Bialtu Pastorte leh DS teamte' kithuahpihna manpha mahmah hi. Tamtak in salam damna angah ua hihhat a hong om uh lamet huai hi. Toupa'n thupina tang hen.

## 2. EBCC ENPUM BIAKIN THAK

EBCC Enpum Biakin kilamlel a melputdan hiai bang ahi: Adunglam: 43', Availam: 24', Vanradah: 10', Atuang (floor) ah tile kipah suak veka, Ceiling hoihtak kithuah a, Lighting leng hoih hun mahmah hi. Amailam ah cemented post 4 muanhuai mahmah kikoihte'n building pumpi kaikip mahmah ding a lamet ahi. Abang (wall) ding in rangva kizang a, window nuailam teng bricks kilem hi. Foundation leng feet 2 vel ding akimsuak in kibawl hi. Nasep patni & zohni: July 26, 2024 & September 14, 2024. Project estimated cost: Rs. 10Lakhs.

Muhdan tangpi: Sum lutzah toh ettuah in building hoih hun mahmah hi a theih ahi a, quality leng sithuai lou hi a muh ahi. Tualsung mite'n leng kipahpih mahmah ua, Local Secretary in hampaha lua uh ahihdan limtak in hon gengen mai. Hiai nasepna ding pan honlakpihtu tengteng tungah kipak mahmah ua, a bik in Head Mistiri, H Gousut leh ateamte tung ah kipahna lian mahmah hi.

- *Rev. Nenglian Vualnam, Director of Development, EBC* ■

---

## EBCC Central Delhi Saptuam Bible Camp 2024 Report:

EBCC Central Delhi in August 23-26, 2024 sung All India Prayer Fellowship, Campus, Chandanhola, Chatarpur, New Delhi ah Saptuam Bible Camp sai uhi. Hiai hun a thugentu in Evan. Upa Lianding Guite, Main Speaker Pastor B Chinkhengoupau, Child Focus leh Rev L Kamzang Youth focus banah Child Evangelism Fellowship ah Mrs. Nemthianhoih, Ms Abam leh Mr. Sudhir te pang uhi. Camp

thupi ding in “Koi a om na hia?” Gen3:9b apan kila khia ahi. Hiai hun ah Camper in naupang 78, Tuailai mi 55, piching mi 91 a vek a gawmkhawm in Camper mi 224 lut thei hi. Pathian Khasiangthou vehna leh kithuahpihna tang in lohching leh gahsuahtak in Camp kizou thei hi. Camp lohchinna ding a thumna, thilpiak sum leh pai, leh tha-le-zung tampi toh mun tuamtuam a pan hon lakpih tengtung ah Pathian min kipahtu ka hon gen uhi. Khasiangthou nnasep ziakin mi hunkhopte'n Hotdamna kitheihelna, mi dang ngaihdamna, Kilatthakna, neithei in om hi. Hiai tan a honpi a hon makaihtu' Pathian thupina leh minletna tengtung i pia uhi.

- **Upa Thangzalun Khuptong**, *Camp Secretary* ■

## Thu Tuamtuam

1. **Mr. Ginsonmuan** s/o G Lamthianmung leh Mr. Damsanglian s/o Dalthaglian Assam Rifles ah sepna mu ua, tua a sepna ua khaloh lak masak penpen uh Pathian gam nasepna leh Pathian kiang a kipahtu genna in Saptuam EBCC Mata, TBUC kiang ah hon pia uhi. Tuailai tuabang lungput nei thupisa mahmah in Khristian Thukizakna ah ka hon taklang uhi. Pathian in a sepna ah ompih in makaih jel henla, hong lamzang jel hen chih ka thumna uh ahi.

- **Upa T Rumzachin**, *Secretary, TBUC, EBCC Mata* ■

2. **Mr H Muangoulian** s/o H Nengkhanlal Kanaan in a sepna Assam Rifle a khaloh lak masakpen Pathian gam nasepna ding leh kipahtu genna in leh EBCC Kanaan Saptuam phungvuhna ding in TBUC kiang ah pia hi. Pathian in a sepna ah ompih in makaih zel henla, hong lamzang zel hen chih ka thumna uh ahi.


- **Upa T Dongkhanthang**, *Secretary TBUC, EBCC Kanaan* ■

3. **Mr T Mangkhumlian** s/o T Suanchinmung, ACA a Laisiangthou (Ph. D) sinlel in a stipend lak masak pen Toupa' gam nasep ding in EBCC Pearsonmun Tualsung Saptuam ah hon pia hi. Hiai toh kisai saptuam in kipahtu kisa mahmah hi, hiai bang nasep hoih tungtawn in midangte a hanthawn a, Pathian min thupina ding in hiai ah i taklang hi. Pathian in a sinna ah ompih in makaih jel henla, hong lamzang jel hen chih ka thumna uh ahi.

- **Upa Pumkhanjam**, *Secretary TBUC, EBCC Pearsonmun* ■



# Ordain Sunna

1. Min: **UPA GINKHOPAU HATZAW**
2. Pianni: 1934
3. Pianna Khua: Tungzang, Chin Hills
4. Baptisma tanni: 1965  
Baptistu: Pastor Khoizachin
5. Pa Min: Go Za Dal Hatzaw
6. Nu Min: Vungzaniang
7. Zi min: Kimlamchiin (2014 a sihsan)
8. Kitenni: 1967                      Kitengsak tu: Pastor Khoizachin  
Nu Awidonlun toh 2019 in Pastor Dr. Suankhanhau tungtawn in EBCC Hiangmun ah kiteng uhi.
9. Gil a gah goutan neihzah: 7                      Pasal: 3                      Numei: 4
10. Tu melmuh zah: 30 leh tusawn 8 mu kha hi.
11. Tulel a omna Saptuam: EBCC Hiangmun, Mizoram Division
12. Tulel a kizatna: TBUC Member
13. Ordain Kum: 1983                      Ordain Petu: Rev Liankhoshyam
14. Pahtakna lai san kum: 2008 
15. Toupa kiang a tawldam ni: April 7, 2024                      Vui ni: April 7, 2024
16. Vuitu Pastor & Saptuam: Pastor B Chinkhengoupau, EBCC Hiangmun
17. Natna: Asthma
18. A tanchin gelbeh nop: laisimna lam ah pawl 3 passed in laisim thei hi. Solfa siam masa leh la lunglut mi ahi. Mizoram buai chiang in Mizoram grouping ah kha khat vel om in huai apan in Suangbem (Myanmar) ah pem hi. kum 1975 in Hiangmun ah tenglut uhi.
19. Saptuam a kizatnate: Hiangmun a EBCC Saptuam 1976 in ding kik in, huai a makai in pang hi. Saptuam a Upa ordain a lak khit nung in kum 14 bang local Chairman ana len a, kum 18 bang DWC (DEC) ah member in pang hi. Jubilee leh Saptuam ni hunte ah ankuanglui tamvei tak nei hi.
20. Khotang a kizatna: Upa Ginkhopau a tangval tunglai apan in khut nasep, gamvak lunglut mahmah mi ahi. Gamsa leng tampi mahmah ana man kha hi. Hiangmun a PNC ah vice president kum 1964-1967 sung ana len kha in 1967-1968 in Unit President len hi. Hiangmun khua a damdawi lam siam a kitam louhman in amah doctor bang a kizang ahihman in khosung mite'n kiphattuampih mahmah hi.  
Mi chidam thei mahmah a theih ahi, a sih ding kuan a damlou chihlounh damlou a a lup lam kithei ngeilou hi. March 3, 2024 a hong damlouh in thumna lunggulh in upate thumna nei ding in samkhawm a, huai hunlai in biakin naihzou lai hi. Hong hatlou hiahiai in doctor tuamtuam najjel mahle uh damsuaah zoulou in April 7, 2024 in a nna a sep leh amuan Toupa kiang tawldam ta hi.



Toupa Khasiangthou in a nutsiat a inkuan leh Saptuamte khamuan in makaih zel hen. ■



## *Kipahthu Genna leh* THUMNA DINGTE

**OCTOBER 2024**

- 1 SEPNAWNNI:** October kha honpi kai i biak Pathian kiang kipahthu gen ni. Tuni a kipan October 3 tan daihdng in IBWU General Assembly Chennai YMCA Auditorium ah omding. Hiai khawmpi ah Central Dorcas sub-committeete vatel ding uh. Pathian ompihna atanna ding un thumpih ni.
- 2 NILAINI:** Tuni in Rev V Thangkhanmuan Youth Co-Ordinator in EBCC Chennai a saptuamte toh hun zang ding thumna ah phawk ni. Tuni in EBCC Vengnuam BYF in Seminar nei ding ua Rev Gin Malsawm in sinsak ding thumpih ni. Dorka khawmpilian 43na Pathian Khasiangthou pina toh nuam leh manphatak in kizouta, honpitu Pathian kiang ah kipahthu gen ni.
- 3 NINGANI:** October 4-6 sung Thanlon Division in Division kumsim khawmpi zangding a, Rev K Kamchinkhup, Director of Missions thugenpi in pangding, khawmpi lohching ahihna ding in thumna ah phawk ni.
- 4 SINTAWPNI:** October 5-6 sung EBC Singngat Division in Kumsim Khawmpi, EBCC Mualnuam ah neiding a, Rev Nenglian Vualnam, Director of Development thugenpi in pangding. Khawmpi lohching ahihna ding in thumna ah phawk ni.
- 5 KIGINNI:** Tuni leh zingchiang in LSD Division Khawmpi zang ding ua, Rev Ginmalsawm in thugen ding thumpih ni. Saptuam Schoolten September 27 apan October 14 tan daihdng term break neilel uh. School khawlsung manphatak a zang a, lutnawn hun a lutnawn siausiau thei ding in Toupa ompihna ngen in thumpih ni.
- 6 NIPINI:** Tuni in LND Division Khawmpi Bible Study Rev Gin Malsawm in sinsak ding thumpih ni. Sawitak mi 4 ten Pastor assistant in amau adia sehsak local saptuamte ah semlel uh, lamzangtak a honsepzom theihna ding un thumpih ni.
- 7 SEPPATNI:** EBC Kumsim Khawmpilian kisakkholhna kipanta, fel leh kizentak a vaisai ahihna ding in Pathian ompihna leh makaihna ngen in thum ni.
- 8 SEPNAWNNI:** October 9-12 sung EBCC Delhi Numei Camp omding a, Rev K Kamchinkhup, DMs. thugenpi hiding, camp lohching ahihna ding in thumna ah phawk ni.
- 9 NILAINI:** October 10-13 sung ZPCS Shillong in Hotdamna Camp neiding a, Evan Lianding Guite thugenpi in pangding, camp lohching ahihna ding in thumna ah phawk ni.

**10 NINGANI:** October 10-13 sung EBCC Jordan in Hotdamna chialpi neiding a, Evan T Damkothang thugenpi in pangding, thumpih ni. October 12 in Youth leh Child lam toh Frame Impactte kithuah in Gospel Centenary Hall ah Tuailai leh naupang college studentte a ding in "One Day Career Workshop" sai ding, lohching leh gahsuahtak a sai ahitheihna ding in thumpih ni.

**11 SINTAWPNI:** October 12-13 sung Gundung Pastor Bial Khawmpi 4veina EBCC Khuangkhai ah omding a, Rev Dr S Vung Minthang, GS thugenpi in pangding, khawmpi lohching leh gahsuaah ahihna ding in thumna ah phawk ni.

**12 KIGINNI:** EBC Headquarters Dorcas Hall pansan a tulai khovel khantouhna toh kiton a media tungtawn a nasepna CMIS kichi enkaitu Mr. Chinsuanlal leh Chingthiannemte leh a inkuante chidamna ngen in thumsak ni. Zingchiang in Evan N Thangsuanpau leh Tuambikna nei unaute'n EBCC Khominthang ah zinghun vazang ding uh thumpih ni.

**13 NIPINI:** Oct. 14-19, 2024 sung Olive Retreat Center, Lamzang ah EBCC Bungmual TBYF in Tuailai Hotdamna Camp zang diing. Thugenpi: Pastor Pauzarual Guite leh Evan. N. Thangsuanpau, Seminar: Evan. N. Thangkhsiam leh Muani Tunlut pang diing. Camp follow-up & Tuailaite Nipini Oct. 20, 2024 zatna nei diing ua thugentu: Pastor Pauzarual Guite pang diing hi camp gahsuaah leh lohching ahihna diing in thumna ah phawk ni.

**14 SEPPATNI:** Division chih, kumsim khawmpi manpha leh lohchingtak a hon zousak i biak Pathian kianga kipahtu gen in, maban a sepkiak ding omte Toupa deihna banga sepkiak ahihzel theihna ding in thum ni.

**15 SEPNAWNNI:** October 16 in CEC tutkhwamna omding, memberten Pathian deihna banga saptuam maban ding hon geel ua, meeting manpha ahihna ding in thumna ah phawk ni.

**16 NILAINI:** October 17-20 sung EBCC Lamka Baptist Church in Tuailaite Nipini program zangding a, Evan T Damkothang thugenpi in pangding. Program manpha leh lohching tak a zat ahihna ding in thumpih ni.

**17 NINGANI:** October 17-20 sung EBCC Penial in Tuailaite Nipini leh Chialpi hun zangding a, Rev Dr S Vung Minthang, General Secretary EBC thugenpi in pangding, chialpi lohching leh gahsuaah ahihna ding in thumpih ni. October 17-20 sung mah in Rev Gin Malsawm, Principal GBC in EBCC Hebron ah Tuailaite Nipini hun zang ding thumpih ni.

**18 SINTAWPNI:** October 19-20 sung EBCC Jordan ah Evan Lianding Guite in Tuailaite Nipini zang in Pathian thutak gending, hiai hun sung mah in Rev V Thangkhanmuan YC in EBCC Lungchin ah Tuailaite Nipini leh chialpina kithuah in hun zang ding thumna ah phawk ni. Saptuam chih ah Tuailaite' Nipini manpha leh gahsuahtak a zoh ahih theihna ding in thumni.

*Kipahthu Genna Leh Thumna Dingte*

**19 KIGINNI:** October 19-20 in Rev K Kamchinkhup, DMS. in EBCC Vaalveng ah Tuailaite Nipini zang in Pathian thutak gending, thumpih ni.

**20 NIPINI:** Tuni Tuailaite Nipini, saptuam chih in manpha leh lohchingtak a zat ahih a, tuailaite lak a kha khanlohna thupi hongtunna ding in thum ni.

**21 SEPPATNI:** October 21-16 sung Himalayan Mission Field in Worship leh Music camp neiding a, Thangbiaklal Valte, Music Promoter in sinsak ding. Ki sinsakna manpha leh lohching ahihna ding in thumna ah phawk ni.

**22 SEPNAWNNI:** October 23-26 sung EBCC Bethany in BYF Camp neiding a, Rev K Kamchinkhup, DMS. leh Evan Lianding Guite thugenpi in pangding uh, camp lohching ahihna ding in thumna ah phawk ni.

**23 NILAINI:** October 24-27 sung EBCC Thuampui, Aizawl in Chialpi neiding a, Evan T Damkhothang thugenpi in pangding, chialpi lohching ahihna ding in thumna ah phawk ni.

**24 NINGANI:** October 25-27 sung EBCC Lamka Baptist Church in Nungzuihna Chialpi neiding a, Rev K Kamchinkhup, DMS. in Pathian thutak gending. Chialpi lohching ahihna ding in thumna ah phawk ni.

**25 SINTAWPNI:** October 26-27 sung EBCC Songtal in Anthak latna hun zangding a, Rev Thawndoulian, Director of Ministries thugenpi in pangding, thumna ah phawk ni.

**26 KIGINNI:** Tuni in EBCC Vengnuam in, tuambiikna neite leh a innkuante toh Fellowship neih sawm hi. Hiai hun ah Evan N. Thangsuanpau & a teamte kizang

ding uh, thumna ah phawk ni. I Saptuam kivaiahawmna toh kisai a Division chih enkai Divisional Superintendentte ziak a kipahthu gen in, amauteh Pathian Saptuamte ma hon kaihzelna ding uah Tunglam pilna ngen in thumpih ni.

**27 NIPINI:** Tuzan in Evan N Thangsuanpau leh tuambiikna nei unauten EBCC Zehang lamka ah hun zang ding uh kizatna manpha ahihna ding in thumpih ni. Toupan heutu honpiak, General Secretary leh Directorte ziak a kipahthu gen in, amauteh Pathian deihna banga saptuam te hon makaihzelna ding uah thumpih ni.

**28 SEPPATNI:** October 29-November 2, 2024 sung EBCC Dinthar, Aizawl in BYF Camp neiding a, Evan T Damkhothang thugenpi in pangding. Camp lohching ahihna ding in Pathian Kha pawlna ngen in thumpih ni.

**29 SEPNAWNNI:** Pathian makaihna liauliau in September khasung in i tuailai nungak 2 gamdang ah WEC tungtawn in ana kuankhe theinawn uhi. Tuni Chiang in Toupa'n gam 15 ah A nna sem ding in hamphatna honpeta, kipahthu gen in, lamzangtak a i septheihzelna ding in thum ni.

**30 NILAINI:** Olive Retreat Centre leh Gospel Centenary hall tungtawn in ministry poimoh taktak sepkiak theih in omzel, Pathian kianga kipahthu genkawm in, maban a tamsem sepkiak ahihna ding in thum ni.

**31 NINGANI:** NDPN tungtawn a Mission Inn, Khominthang a laisim a om tuailai 15te ziak a kipahthu gen in, amauteh maban a lohchinna honngah ua, Khrist a dia theihpihu muanhuai hong hihna ding un thumna ah phawk ni. ■

---

---

---

Postal Regd. No. MNP 07 | Regd. No. 22344/70

**BOOK POST**

If undelivered, please return to

The Editor,  
CHRISTIAN THUKIZAKNA  
P.O. Box-6, Dorcas Hall,  
New Lamka-795006, Manipur, India

EBC media

# Kikhenna bang chi mualsuah di

Nasepte 4:32; Johan 17:21; 1Kor. 1:10 11:12:25 27;  
Eph. 4:31 32; Matt. 6:14 15; 7:1 3;  
Pau. 15:1; Jakob 4:11 12

# 20124

Edited & Published by Rev. Dr. S. Vung Minthang for the Evangelical Baptist Convention  
Designed and Printed at Convention Book House, Dorcas Hall Campus, New Lamka - 795006